

四庫全書

史部

欽定四庫全書

史部
關中奏議卷八

詳校官侍講_臣法式善

編修_臣裴謙覆勘

總校官進士_臣繆琪

校對官中書_臣王家賓

謄錄監生_臣楊景猷

欽定四庫全書

關中奏議卷八

明 楊一清 撰

總制類

一爲預防邊患事

兵部覆該本部於兵科抄出總制陝西延寧甘肅邊務兼督理馬政都察院左副都御史楊一清題近該兵部咨該總制大同宣府偏頭關等處邊務都察院右都御

史劉宇奏要會集邊兵以勦滅套寇該本部看得各鎮有事俱宜彼此相濟合無再行總制都御史楊轉行各處守臣知會今若大同賊勢衆大十分告急延綏總兵官合量帶精兵赴援不許坐觀成敗儻後延綏亦有十分警急宣大二鎮總兵官亦要親自將兵策應不可顧今日自己之利忘他日隣境之憂庶幾事體不偏人心可服等因題奉欽依備咨前來案照先准兵部咨爲大寇臨邊整兵防禦事亦該總制都御史劉宇奏要徵調

延綏兵馬已經併行延綏總兵官張安整棚聽候如遇大同聲息十分緊急移文徵調即便量帶精兵赴援外查得延綏副總兵姜漢所領奇兵三千餘員名遊擊將軍戴欽所領遊兵三千餘員名俱於本年三月內大同調去策應至今五箇餘月未回切緣近年套衆恃其巢點河凍則西行以寇關陝河開則東渡以窺宣大不曾痛遭誅勦肆無忌憚今年自正月間陝西靜寧隆德地方搶掠回套渡河之後雖在大同宣府近邊住牧不曾

入境侵掠想因總制都御史劉宇蒐選強兵要行會勦
先聲所傳全部畏遜今秋高馬肥時月既不得志於北
冬寒河凍必將垂涎於西部落種類既繁動稱數萬會
計陝西延綏甘肅三鎮見在人馬不足以當大同一鎮
之數且甘肅地方四時警報不絕官軍難以掣調寧夏
兵勢餒弱山後之衆不時侵擾僅能支持所恃以捍禦
邊陲保障腹裏惟延綏一鎮士馬精強緩急可倚但自
遊奇二兵調去之外所遺老家并新募有馬官軍不過

八千餘員名東接偏頭關西寧夏千有餘里大小營堡
三十四處分兵而守無所不寡勢須自保難再輕掣及
查得弘治十八年九月內臣巡撫陝西因恐套衆踏冰
入寇延綏遊奇人馬調去大同未回奏已行令延綏副
總兵遊擊將軍姜漢叅將王戟作急將所領官軍掣回
曹雄奇兵暫於定邊營駐劄以便延寧兩境策應姜漢
遊兵王戟土兵於花馬池興武營等處按伏如果敵衆
入套擁衆近邊與寧夏副總兵叅將協同守備等官人

馬併力捍禦保固邊牆不令入境該兵部議擬覆奏奉聖旨是便行與各官着同心協力相機防禦不許自分彼此致悞事機欽此欽遵通行去後本年十二月內敵人擁衆自花馬池拆牆深入腹裏搶掠止是調到王戟土兵猝與敵遇交鋒失利其延綏副總兵竒兵遊擊將軍遊兵俱未到邊臣不次移文督調終是緩不及期蓋因各該官軍初自大同掣回未及休息遽遭大敵以此應援不及向使各枝兵馬早得掣回如臣所擬分守地

方駐劄套衆未必敢爾長驅深入縱不能過其初入之
鋒襲蹤而進會合陝西官軍取便截邀未必無功往事
無可說已今不早爲之處冬間套衆設復有警不無仍
前誤事臣惟大同宣府爲北門鎖鑰果有重大聲息乃
京師門庭之敵臣亦當親提師旅前去應援豈敢輒議
掣兵但聞今年套衆實不曾侵犯二鎮而延綏遊奇兵
馬在彼久駐師老力竭人馬疲敝非惟坐糜彼處糧草
亦恐將失本處事機况宣大偏頭關三鎮總制挑選精

銳援兵已有五萬六百餘員名足勾截勦似亦不藉延綏數年官軍之力臣有地方安危之責不敢不言如蒙乞勅兵部計議合無齎文總制都御史劉宇并各該守臣查勘如果套衆不曾犯邊別無重大聲息速將延綏遊奇二兵發回本鎮暫時休息收拾軍裝衣鞋聽候調遣防禦套衆仍乞通行大同宣府偏頭關三鎮鎮巡官員各照兵部節次題奉欽依事理彼此相濟互相應援待十月間哨探若是套衆西行遊奇將官即便那至本

境陝西交界去處駐劄敵果入套延綏守臣徵調即便
前來會合應援截殺如是聲息十分緊急宣大二鎮總
兵官亦照該部今次所奏親自將兵策應以寬皇上西
顧之憂以祛關陝兵民之患庶得彼此相濟地方可保
無虞等因具本該通政使司官奏奉聖旨兵部知道欽
此欽遵抄出送司查得先爲會集邊兵以勦滅套敵事
該總制大同都御史劉宇題稱延寧地界與本鎮相連
乞行各鎮守臣知會今後如遇有警言預調軍馬毋分彼

此就便督發起程會合截殺等因具本前來該本部議
行總制陝西都御史楊轉行各該守臣若遇大同敵勢
重大十分告急延綏總兵官量帶精兵赴援以後延綏
亦有十分緊急宣大二鎮總兵官亦要親自將兵策應
等因題奉聖旨是欽此已經通行欽遵去後續爲軍務
事該延綏副總兵姜漢遊擊將軍戴欽各題稱抄蒙總
制大同都御史劉宇鈞帖行令將所領遊奇兵馬俱各
掣回本鎮蓄養軍銳聽候遇警徵調已於八月十七日

掣回等因具本前來本部又經案候外今該前因案呈
到部除延綏遊奇兵已經掣回操候別無定奪外看得
總制都御史楊奏稱套衆糾點河凍則西寇關陝河開
則東窺宣大今歲宣大地方俱未入境侵掠冬寒河凍
必將垂涎於西及稱陝西等處兵力所在不足欲要通行
宣大偏頭關各該守臣待有警報遊奇兵馬那至本境
交界去處駐劄以備徵調截殺若是聲息十分緊急二
鎮總兵官亦照該部先次所奏親自將兵策應共紓邊

患一節切緣邊人之性專以搶掠爲生今既不得於東則西寇之謀勢所難免即今天寒在邇先事之防不可不慮況查與本部先次奏行事理大意相同合無本部一面行移陝西等處總制都御史楊轉行各路守臣督令各該將官當此河冰未凍事勢稍緩之時將各項馬步官軍招募土兵人等用心操練聽候調用各該通敵要害如花馬池等處嚴明斥堠慎固封守及一切防禦事宜俱要計慮周悉萬一故智復逞擁衆入侵即便分

布將士或戰或守隨宜相機調度務使此敵大遭挫衄
用靖地方毋得輕忽貽患有孤委任一面行移宣大等
處總制都御史劉宇轉行各路守臣將遊奇二項軍馬
整點齊備聽候徵調如果敵已渡河西行延綏報至即
便起程前去會同彼處官軍相兼戰守若是聲息十分
重大二鎮總兵官仍要查照先次本部奏行事理量帶
精兵親去策應共濟邊務不許秦越相視託故遲延設
有妨誤厥罪惟均緣係總制官員奏要徵兵禦敵及奉

欽依兵部知道事理未敢擅便正德元年九月十九日
本部尚書許進等具題本月二十一日奉聖旨是便行
與各官果有重大聲急務要互相策應不許自分彼此
致誤事機欽此欽遵擬合通行除外合咨前去煩爲轉
行彼處各該鎮巡等官一體欽遵施行

一爲薦賢爲國事

題爲薦賢爲國事臣惟今天下邊鎮皆有武臣以總戎
事要害重地則掛印充總兵官然必用巡撫都御史一

員贊理糾察之文武並用犬牙相制立法之善度越前
古奈何近年以來邊備漸弛兵威不振以致敵勢驕橫
民遭荼毒有識之士痛心切齒陝西各邊士馬臣所親
閱其間堪戰之兵數非不多而練兵之將實不多見大
抵以軍法則不嚴以軍令則不明以軍容則不整以軍
威則不揚無事則玩愒相安遇警則倉皇失措竊恐他
鎮亦或相類如是而望敵人懾服邊境肅清不可得也
若此者蓋不獨將官之過而凡爲巡撫者有厚責焉今

之巡撫非不極一時之選但人才難得而邊鎮巡撫得人尤難且近代用人未免較其年勞限於資格舍是則躁進之門寢啟失人之弊轉甚若以年資待常格以不次拔異等二者並行而不相悖庶幾真才出乎其間邊事可從而理臣又思得近年邊事之廢皆起於因循成於姑息而極於蒙蔽必用剛明果斷尚氣節輕富貴之人庶幾頽惰之俗可矯軟美之習可變誕謾之風可除茲當太平全盛之世賢俊林立隨取隨足不可謂無其

人但臣局於職守聞見有限臣所知者陝西按察司副使王雲鳳以儒飾吏正而不迂以刑弼教剛而不虐有凜然不可犯之風有介然不可奪之操陝西行太僕寺卿王琰耿介自持言笑不苟爲戶曹而執守素著司馬政則卿寺生風養病吏部文選司郎中張綵懷抱磊落才識疏通生長西方素諳邊事頃者一遭言論毅然求歸杜門却掃無復仕進之意即此一節可激顏懦此三人者王雲鳳王琰皆陝西屬官張綵陝西鄉宦故臣知

之爲真使當邊鎮之寄授巡撫之任必皆有虎豹在山之勢竊念薦賢爲國非爲私也但臣任總戎務不敢出位而思故以職業所及者言之況以人事君大臣之責舉爾所知求賢之要臣雖無狀承乏重位苟有所見豈敢緘默伏望聖明察臣朴忠恕臣僭妄乞勅吏部詢之輿論如果王雲鳳王琰張綵材有可取遇有各邊巡撫員缺照例推舉上請簡用必不負朝廷任使而愚臣尸素之罪亦將藉是以少逭萬一矣緣係薦賢爲國事理

謹題請旨

一爲乞恩停免進貢紅花以恤邊兵事

工部覆都水清吏司案呈奉本部送於工科抄出欽差
總制陝西延綏寧夏甘肅等處邊務兼督理馬政都察
院左副都御史楊題行據鎮守寧夏總兵官右軍都督
僉事李祥呈行准鎮守都知監太監葛全手本查得寧
夏城并中衛所種進貢紅花空閒地三頃三十畝遞年
額撥空閒餘丁老幼一百名播種澆灌水利立夏之際

欽定四庫全書

關中奏議
卷八

十

乞討冬操餘丁一百九十名薊鉏至六月終花藥開綻
一時急不能摘恐被雨水日色淋曬不便先儘種花餘
丁一百名并乞討餘丁七百九十名次第採摘約二十
餘日花藥開放將盡疎放每年採過鮮花洗曬每五百
八兩做乾花一斤弘治十七年分收過紅花一千四百
零二斤弘治十八年分收過紅花一千五百五十二斤
今正德元年收過一千二十五斤俱遵照欽依事理差
的當人員給脚力管送赴京進貢交納等因及查得本

職處接管進貢紅花寧夏空間地三頃四十二畝額撥
空間老幼餘丁一百三名春初耕種澆灌立夏乞撥冬
操餘丁八百名相兼種花耘鋤六月花開次第差撥餘
丁八百名挨次採摘二十餘日待花開盡疎放弘治十
七十八二年共收乾花一千八百八十五斤一兩七錢
進貢外今正德元年收過紅花七百七十斤二兩七錢
亦照欽奉勅旨差官管送進貢交納等因開呈到臣案
查先爲前事訪得寧夏鎮守衙門連年採摘進貢紅花

撥用官軍數多恐有別項私役情弊已行查報去後今據前因切照惟正之供在聖王不能廢畢獻方物亦臣子所當爲寧夏鎮守太監總兵進貢紅花未知起自何年及稱節奉欽依事例各該官司亦無案卷可查以臣度之既不經由司府衛所衙門又無額徵一定斤數其非任土常貢明矣先年或以其土產之良暫時取用又恐喜事貢諛之輩倡而爲之遞年相承以爲故事夫紅花之爲物取之以供服用固非奇技淫巧之比但播種

澆灌薅鋤採摘之役撥用軍丁動以千計前項查報猶恐未的經該人員藉是以耘種私田營幹私事者難保必無計其所進之數兩鎮守衙門每歲共不過二千餘斤裝盛櫃扛差官賁進起撥車輛人夫寧夏距京師幾四千里未免騷擾驛遞中間指稱盤費打點等項使用莫可查考利之歸於官者甚少害之及於人者實多且寧夏地方孤懸河外與敵爲隣在先年間邊境寧謐年穀豐登軍有餘力似不爲虐近年以來山後之敵不時窺

伺河套之敵乘凍侵擾按伏截殺徵調無休正兵兼有
守墩守牆守堡之勞餘丁又有修邊修渠修壩之役加
之頻年荒旱衣食不繼屯糧重大輸運孔艱原領軍伍
凋耗居半逃者未復存者又逃不得已而抽選招募求
以實邊所得不償所亡空虛轉甚陝西各鎮邊兵未有
若寧夏之最貧且弱者將來事勢臣切憂之及今正宜
多方寬恤扶衰補羸以圖元氣之復一切不急之務似
應停止臣切惟聖明軫念邊鎮重地歲發帑藏之銀易

買糧草馬匹不知若干萬兩前項紅花京師所值價銀
不過數百餘兩若蠲每歲數百兩之銀寬每歲數千人
之役所失者小所得者大亦何足惜如蒙乞勅工部查
議合無將寧夏鎮守太監總兵進貢紅花特降德音停
免額撥播種餘丁聽當別差果有欽奉先朝著爲常貢
勅旨亦乞暫停三五年以恤邊兵用成損上益下之美
且免假公營私之弊所謂寬一分則受一分之賜邊人
雲霓之望此其一端也等因奏奉聖旨該部知道欽此

欽遵抄出送司案呈弘治十四年爲進貢事該鎮守寧夏太監張佃署都督僉事郭鈞各題節奉勅諭朝廷公用紅花今民間艱難不欲科買勅至即依永樂年中量撥老幼餘丁責令老成清正官員提督於空閒田地內布種俟收成後差的當人官給脚力管送赴京交納欽此欽遵照得今年本鎮河套大勢敵衆俱在邊外下營不時拆牆出沒又沿途人車扛擡運送接遞繁多疲勞已甚若照常年進貢誠恐中途不便如蒙聖恩愍念邊

方多事民夫困苦乞將該進紅花待候聲息稍寧差人
進貢俱節奉孝宗皇帝聖旨是欽此欽遵案呈到部臣
等看得左副都御史楊題稱寧夏兩鎮守衙門每歲所
進紅花共不過二千餘斤播種澆灌薅鋤摘採之役撥
用軍丁動以千計裝盛櫃扛差官費進起撥車輛人夫
寧夏距京畿四千里未免搔擾驛遞中間指稱盤費打
點等項使用莫可查考利之歸於官者甚少害之及於
人者實多兼且地方孤懸河外與敵爲隣近年以來山

後之賊不時窺伺河套之寇乘凍侵擾按伏截殺徵調無休正兵兼有守墩守牆守堡之勞餘丁又有修邊修渠修壩之役加之頻年旱荒衣食不繼屯糧重大輸運孔艱原額軍伍凋耗居半及今正宜多方寬恤衰補羸一切不急之務似應停止又況邊鎮重地歲發帑藏之銀易買糧草馬匹不知若干萬兩前項紅花京師所值價銀不過數百餘兩若蠲每歲數百兩之銀寬每歲數千人之役所失者小所得者大乞降德音停免額撥

播種餘丁聽當別差果有欽奉先朝著爲常貢勅旨乞
暫停三五年以恤邊兵一節切照寧夏係要害邊鎮况
近年以來兵荒交集所在軍民艱苦萬狀正宜寬恤以
保邊防本官親歷其地不爲無見今雖查有先年勅旨
亦不係常貢之物其染造衙門所用自有河南等布政
司去處歲辦輸納並不缺乏伏望皇上軫念邊防俯從
本官所擬將前項紅花永蠲進貢以蘇軍困如果用度
浩繁着令該衙門計出臣等斟酌腹裏出產地方從宜

科買以足原數仍將原種紅花地土行移戶部改爲屯田徵收子粒少濟邊儲原撥軍丁悉令各還衛聽當別差如此庶供應不失邊困少甦便益緣係停免進貢紅花以恤邊兵及奉欽依該部知道事理未敢擅便正德元年十月十三日本部尚書曾鑑等具題次日奉聖旨紅花照舊進欽此欽遵擬合通行除外合咨前去煩照本部題奉欽依內事理欽遵施行

一爲應詔陳言原情有罪保全將官等事

題爲應詔陳言原情有罪保全將官以勵人心事行據
整飭固原等處兵備陝西等處提刑按察司副使高崇
熙呈抄奉臣劄付前事依奉親詣孔壩溝楊琳交戰去
處拘集地方知因人李通楊鑑等前來審據李通等供
稱弘治十四年間七月內巡撫御史周季麟在於固原
駐劄聞知敵衆侵犯韋州地方隨差陝西都司都指揮
僉事楊琳率領官軍九百九十四員名前往黑水口按
伏截殺本月二十四日楊琳據夜不收馬黑兒走報敵

衆進至打狼川本日至午時敵衆萬餘先已攻圍鎮戎所彼時楊琳以衆寡不敵與隨征西安左衛指揮朱鼎等議要仍駐黑水口以避其鋒有朱鼎等回說若不進兵被周都堂打一百也只是死不如進戰便死也有名楊琳當即發軍本日未時分行至孔壩溝率遇大勢敵衆約五六萬騎連山遍野滿川前來迎敵占在四面高崗將官軍圍在溝南兩陣相離不上三十餘步楊琳在中軍發放如今彼衆我寡且又陷在死地須是大家力

戰求生當令指揮朱鼎妙齡武臣許慶千戶楊璽各分
一面督軍當先對敵因是兩鎮相近矢無虛發戰至戌
時官軍死者三百餘人敵衆死者亦有百十餘人官軍
在前者奮死力戰在內者擠捱不得展手彼時心慌目
亂莫辨誰何直至昏晚罷戰敵衆俱在周圍劊營又值
夜雨如注不息至天明二十五日軍火器具皆濕又復
交鋒彼說不要殺了只與我馬罷官軍叱罵固拒捨死
力戰至巳時官軍死者又約三百餘人敵死者亦有八

九十人俱在溝中重疊枕藉敵見朱鼎妙齡武臣許慶
楊璽善戰當先讎視四面攢合擁擠向前將朱鼎等鈎
撓下馬俱支解訖楊琳與見在中傷官軍三百餘員名
各中鎗箭血流模糊俱在死屍內掩藏敵退方纔走出
回城今蒙審供是實等因備供具呈到臣案照先准兵
部咨該本部題該貴州道監察御史楊儀題稱弘治十
四年七月內陝西敵衆大舉入攻直抵固原衛葫蘆硤
口官軍莫敢當鋒都指揮楊琳提一千之弱兵當十萬

之強敵奮不顧身輸心死戰人疲力竭矢盡手空致傷
官軍數多事非得已彼時居民賴以逃避敵衆多被殺
傷其抵敵之勇亦爲可嘉比之閉門不出臨陣在逃怯
懦無爲者萬萬不同要乞免其充軍或降級或立功或
復其舊官戴罪出征等因具本該本官題奉孝宗皇帝
聖旨兵部看了來說欽此欽遵抄出送司案呈到部看
得充軍都指揮楊琳先該大理寺少卿何鈞等官叅稱
輕率交鋒全軍覆敗問擬斬罪後以總制尚書秦紘奏

稱彼衆我寡情有可矜欽蒙寬宥止着充軍續該會官
議奏奉欽依免解配所送秦紘處聽用征戰前後俱據
各官所奏議處情法似已兩盡今御史楊儀又奏前因
緣楊儀係耳目官員生長邊方反覆懇言必有所見合
無本部仍行巡撫都御史楊親詣楊琳交鋒去處拘集
地方知因之人詳究始末斟酌情勢如果楊琳彼時功
罪相當難以成敗例論前項節次議處未當其情備細
從實奏報以憑定奪若是情法已是兩盡止令可圖後

功聽其查照原擬從宜委用俟其立有功勲另行奏請
陞賞等因題奉欽依是着從實查勘明白來說欽此欽
遵備咨准此已經劄委整飭固原兵備副使高崇熙前
去彼處拘集地方知因之人從公體勘具實回報去後
今據前因照得臣自領馬政改巡撫及今總制邊務久
駐固原弘治十四年敵衆入侵官軍失事情由廣詢博
訪知之頗悉近又親詣孔壩溝楊琳交戰去處拘集住
人相度形勢審勘至于再三看得楊琳以寡禦衆奮死

對敵又值夜雨如注弓矢銃砲火藥俱濕不堪使用官軍雖多損折敵衆亦多殺傷阻遏抗拒至於一日夜之久不但山野居民得以逃避而固原各城堡官軍聞警戒嚴方得保全不然地方之患尤有不可言者較其功罪似亦相當且孔壩溝南至黑水口三十餘里北至鎮戎所僅七八里彼時黑水鎮戎俱有按伏人馬而鎮巡重臣又在固原駐劄相去不遠初傳敵衆攻圍鎮戎人心震恐楊琳領軍急趨而進意欲與鎮戎所主客官軍

合兵拒守且料因原援兵必至不期未到鎮戎驟遇強敵外無救援只得奮勇對敵事勢至此無可奈何比之怯懦逗遛者委的不同以此總制尚書秦紘監察御史楊儀先後論辯而楊儀之言尤爲激切蓋以近日各邊將官動以楊琳藉口寇至則嬰城自守杜門不出坐視深入不交一矢以圖全軍致令敵騎蔑我無人肆行無忌戕害生靈搶掠頭畜其數無算元氣爲之蕭索流弊至此故欲寬彼覆軍之罪用勵敢戰之人臣聞勝負兵

家之常成敗利鈍誠難逆覩古之名將不能保其無敗
若使沿邊小大將官咸懷以身徇國之忠遇敵量力以
戰不先爲退怯縱不能保其常勝亦豈得全然無功彼
既知我處處有敢戰之兵未必不少沮其方張之勢故
欲正朝廷之軍法則楊琳之罪不可恕而前項議處已
是從寬欲振今日之頽風則楊琳之情有可矜而言官
論列不爲無見況其數年以來械繫之苦戍役之勞飢
寒迫身窘辱已甚原情度勢委的人共惜之如蒙乞勅

該部通查楊琳始末事狀及各官奏辯緣由再爲詳議具奏伏望聖慈察功過於心跡之中惜人材於成敗之外特降恩典或量爲降級或限年立功以爲將官敢死奮勇者之勸如此則戰將生氣而邊敵不足憂矣緣係言官奏辯保全將官又該部題奉欽依着從實查勘明白來說事理未敢擅便爲此具本順差承差姚達親賫謹題請旨

一爲急缺領軍官員事

兵部覆該本部送於兵科抄出總制陝西延寧甘肅等處邊務兼督理馬政都察院左副都御史楊題准兵部咨該臣題據鎮守延綏等處地方總兵官都督僉事張安呈爲停補添設領兵官員事據威武堡把總指揮周昇呈據本堡住坐延綏領軍署都指揮僉事傅釗下舍人傅越告稱有父傅釗於正德元年五月二十二日得患傷寒病症請醫用藥調治不痊至本年六月二十二日因前病身故等因看得傅釗原係奉勅管領土兵聽

調截殺人員會同鎮守太監劉保巡撫右副都御史文
貴議查得本鎮土兵自弘治十四年來各有原招陞任
指揮千百戶管束俱在各該營堡聽從把總坐營等官
管領操備遇有聲息調遣領兵將官一例挑選率領與
同遊竒老家官軍協力追勦策應已是定規後於弘治
十七年七月內該兵部行取先致仕後委領軍叅將王
軫到部聽用本官奏准給領土兵二千聽調截殺正德
元年二月內本官奏准致仕本部又將綏德衛指揮同

知傳釗推陞署都指揮僉事領勅接管緣前項土兵係是招募之數各有把總坐堡及原招指揮千百戶管束又有分守叅將并鎮守太監總兵巡撫等官統領若再添官管理政出多門實爲難堪今照傳釗已故合無將本官員缺停革免行推補將所領土兵仍令各該營堡管束照舊操守遇有徵調臨期擇委相應都指揮指揮統領前去策應截殺實爲良便除具題外呈乞照驗施行等因具呈到臣看得鎮守延綏總兵官都督僉事張

安呈稱領軍署都指揮僉事傅釗病故要將本官員缺
停革免行推補將所領土兵仍令各該營堡管束照舊
操守遇有徵調臨期擇委相應官員統領前去策應截
殺一節切照前項招募義勇土兵生長邊方勇悍善鬪
但既招之後不曾操練所司因要存省糧儲分班疎放
日就散逸弘治十七年叅將王戟奏准統領二千員名
聽調截殺去歲應援大同斬獲首級與遊奇二兵相等
冬間策應寧夏猝遇敵衆入寇雖有虧折而保全花馬

池官軍之功實多是難以無用之兵目之矣今敵勢驕橫我軍寡少節該科道等官建白皆以招募爲言若已招之兵置之不用又安用新招爲哉臣愚方欲將前項土兵增選輾足三千員名擇官統領操練東可以應援大同勦京師門庭之患西可以禦防寧夏弭陝西腹心之患而延綏鎮巡官員乃欲停革散遣推原其意實以此兵之設徒應別鎮而無益於延綏又恐緊急徵調搶兌老家馬匹是蓋知爲延綏謀而不知爲大同謀爲陝

西謀也且延綏挑去遊奇二千之外老家人馬委俱缺
少但此數千之兵聚爲一枝則有餘而可用散之各堡
則不足而無益臣近日巡邊閱視得延綏地方官軍驍
健山澗險阻一時守臣號爲得人近該巡撫都御史文
貴修造甃墩制度精巧賊難攻窆足以伐其邪謀不敢
輕犯犯則易於阻截惟寧夏花馬池直抵靈州三百餘
里最爲受敵要害彼處邊備久弛兵威不振全仗延綏
遊奇等兵策應萬一大同之嚴未解河套之警已至顧

此失彼何以處之延綏老家之兵勢須自保難再輕掣若不急如前議將招募義勇土兵增選精練擇官統領以備非常非計之得者也查得叅將王戟原領招募二千員名搶兌正馱馬共二千一百七十二匹後該都指揮傅釗奏稱見在官軍止有一千九百四十員名陣亡傷損軍人六十名見在正馱馬一千四百九十四匹花馬池被敵射死奪去及倒死馬六百七十八匹除瘡癘瘦損不堪外堪以出戰馬止有一千二百五十二匹前

項缺少馬匹若不另爲處置臨期搶兌委的虧累舊軍
臣已將今年洮河二衛茶馬給與一千補足前數騎操
但急缺統領官軍誠恐人心渙散遇警急難收拾然此
等新集土兵紀律進止終不閑習必得老成官員管束
訓練緩急乃可倚賴此等官員不時徵調援別鎮必須
量與將官名目庶幾便於行事博訪得榆林城把總都
指揮僉事王勛知兵持重綏德衛指揮同知藍海善戰
有名此二人者延綏之兵素所信服相應擢用領軍如

蒙乞勅兵部叅詳訪察合無於王勛藍海內推用一員
上請量與將官名目照例請勅統領前項土兵仍令除
見領官兵外再於各營堡原招土兵一萬數內著實挑
選精壯勇銳務輳足三千名原選不堪者即爲挑補該
用正馱馬匹除見在并新給外不敷之數臣另爲查處
給用毋令搶兌老家軍人馬匹挑選停當擇委相應官
員把總管隊嚴立規格精加訓練今年秋末冬初調赴
花馬池操備儻敵人入套與遊竒二兵併力捍禦若賊

衆折牆深入腹裏聽臣隨宜調遣截殺以後大同宣府有警遊奇之外此兵可以聽調延綏總兵官張安人馬若非十分緊急不宜輕動如臣所擬豈但有益諸鎮其於延綏兵勢不爲無補何必急爲散遣之舉以遂目前自便之計哉等因具本該通政使司官奏奉聖旨兵部知道欽此欽遵抄出送司查得先爲停補添設領兵官員事該延綏鎮巡官奏稱管領土兵都指揮傅釗病故乞要免再推補前項土兵止令各該營堡管束操守遇

有警調臨期委官統領該本部議擬行移總制都御史
楊查勘前項官員應否裁革已經題奉欽依欽遵查勘
去後未報今該前因案呈到部看得總制都御史楊題
稱前項添設領軍官員極於邊方有益今都指揮傅釗
病故仍要將前項土兵增足三千員名照舊擇官統領
操練一節緣查有前項題奉欽依行勘事理本部難便
議擬合行併勘爲此合咨前去煩爲查照先令事理從
公查勘前項領軍官員如果有益邊方相應照舊設官

管領操練明白具奏前來以憑上請定奪若有窒碍官
多事擾應該裁革亦希咨報前來施行等因備咨到臣
案查先爲前事已經具題去後續准兵部咨該延綏鎮
守等官太監劉保等題爲停補添設領兵官員事該本
部覆題奉欽依備咨前來勘議間今准前因切照延綏
寧夏皆防邊大鎮城堡星分原額軍人數少中間又多
逃故不敷防禦近年敵衆入攻動號數萬我軍以一當
十惴惴自保不聞克捷之功先帝采納廷議遣官招募

兩鎮共得土兵二萬之上每名給領官銀五兩優免一
丁幫貼招首人員又皆論功陞授但既募之後不聞操
練僅供土水接遞之役殊非招軍本意兩鎮所募之人
臣多親閱大半勇壯可用而延綏新軍尤爲慄悍練而
將之悉皆精兵叅將王戟所選二千員名馬匹盔甲軍
器俱已給領東西應援行伍坐作方始就緒得人相繼
統領約束於地方實爲有補而延綏守臣散遣之意臣
固已論之於前矣且今敵情難測各鎮以延綏遊奇二

千爲援萬一大同延綏俱有警報或入套之衆分寇延
寧未免顧此失彼臣愚欲不廢此兵者實欲藉其與遊
奇二兵共成犄角之功以備各鎮緩急徵調之需耳若
欲散還各堡所各把總坐堡官操練有警調用臣竊謂
聚爲一枝擇官領之軍令素行人情素附可責成效散
之各堡多者百餘名少者數十名倉卒輾合將不知兵
兵不知將而欲恃以成功難矣况寧夏土兵遠不及延
綏寧夏已奏設都指揮韓斌統領土兵三千員名備冬

防守而延綏土兵乃欲散遣其材事體似亦有偏臣斟酌事勢熟思審處前項土兵仍宜設官統領爲便如蒙乞勅兵部計議合無將延綏招募義勇士兵俯從前議照依寧夏事例選轉三千員名惟復照舊二千員名仍推舉相應官員統領照例請勅行事以備各鎮調用則邊兵增重地方幸甚等因具本該通政使司官奏奉聖旨兵部知道欽此欽遵抄出送司查得先爲前事已行查勘去後今該前因案呈到部看得陝西等處總制都

御史楊所奏反覆論辯大意謂延綏前項土兵擇官統領聽調極於邊方有益不宜散遣乞要查照寧夏事例選轄三千員名或止照舊數仍推舉相應官員管束照例請勅行事以備各鎮調用一節既該總制官員查勘前來必其事體相應叅酌停當況今敵衆在套正宜練習強兵以備不虞合無本部依其所奏仍行本官轉行延綏鎮巡官員將前項土兵選轄一千員名通前三千之數仍舊團聚操練用濟邊務但原管都指揮傅釗先

已病故見今缺人管理今查得本官原保都指揮王勛
指揮同知藍海俱合相應緣王勛近該本部議擬奏奉
欽依協同分守寧夏西路去訖所據藍海知兵善戰人
素信服堪以委用伏乞聖明裁處仍量加都司署職以
便行事候命下之日請勅一道齎付本官統領前項官
軍操練聽調務要律已奉公撫恤軍士奮勇効勞以副
委任如或貪黷僨事罪有所歸一應軍務仍聽總制鎮
巡等官節制不許偏執致有妨悞緣係議處土兵及奉

欽依兵部知道事理未敢擅便正德元年十二月二十七日本部尚書閻仲實等具題二十九日奉聖旨藍海陞署都指揮僉事統領土兵操練聽調寫勅與他欽此欽遵擬合通行除外合咨前去煩照本部題奉欽依內事理欽遵施行

一爲分布邊兵預防敵患事

兵部覆該本部送於兵科抄出總制陝西延綏寧夏甘肅等處邊務兼督理馬政都察院左副都御史楊一清

題照得黃河將凍敵衆雖未見入套備禦之計在我不得
不嚴看得延綏定邊營迤西直抵寧夏靈州地方廣
袤平漫無險可據邊牆低薄壕塹淤塞不堪保障敵每
從此折牆深入陝西環慶固原地方搶掠上厓九重宵
旰之憂臣切詳敵衆頻年犯順其氣方張不曾遭挫必
無懲戒然其志已驕其欲無厭天實怒之今歲若復不
肯悔禍決當重遭殛罰臣受命總制各路兵馬謹當申
嚴號令分布主客官軍揚兵耀武以伐其謀於未入之

先出奇設伏以乘其弊於將歸之際然須脫畧常法隨
事達變乃克有功且善戰者必知分合善守者必審常
變我邊兵患於備多將病於權分各據利便自分彼此
機可乘而不乘兵當合而不合其輕率寡謀者則又知
常而不知變往往墮其計中以致我武不揚寇氛日肆
職此之由今將沿邊至腹裏分爲四路以定邊營花馬
池興武營靈州一帶爲藩籬以石溝鹽池韋州萌城山
城一帶爲門戶以固原黑水口鎮戎所西安州海刺都

一帶爲庭除以安定會寧靜寧隆德平涼一帶爲堂室
行令延綏副總兵姜漢統領奇兵遊擊將軍戴欽統領
遊兵及暫委綏德衛指揮藍海管領土兵各限十一月
初一日起程遊兵於花馬池營駐劄奇兵暫於定邊營
駐劄土兵暫於寧塞營駐劄寧夏副總兵衛勇統領奇
兵官軍於興武營都指揮韓斌統領土兵於清水營亦
限十一月初一日到彼駐劄敵果入套西行延綏奇兵
那至花馬池量分於安定柳楊二堡土兵那至定邊營

量分於鹽場三山等各聯絡駐劄與分守叅將葉椿閣
網協同都指揮保勳等振揚威武併力防禦以壯藩籬
寧夏總兵官李祥統領戰鋒奇正官軍先期於靈州駐
劄有警那至石溝分守寧夏西路叅將馮禎統領寧夏
中衛廣武營選鋒奇兵官軍前來鳴沙州陝西遊擊將
軍陳善領兵於韋州環慶守備都指揮姚震領兵於山
城各駐劄以嚴門戶鎮守陝西署都督僉事曹雄統兵
於鎮戎所調度固原靖邊蘭州一帶主客官軍以保庭

除仍預行甘肅遊擊將軍徐謙統領甘涼遊兵并千戶
魯經土兵各於莊浪操候河套有警調至安定會寧與
甘涼備禦下班官軍併謀齊力以守堂室前項分布既
定沿邊守將嚴謹斥堠多差夜不收遠爲接哨沿邊多
設塘馬但有套敵烟塵消息或走回人口供說即便傳
塘走報隣境官軍隄備敵果近邊各該主客官兵分據
要害占守水頭從宜阻遏寇小至則擊之不可輕進遠
追仍要互相應援不許自分彼此如敵大至切勿與之

爭鋒各取便歛入城堡以避之待其擁衆深入延綏遊
奇土兵寧夏副總兵都指揮韓斌等枝人馬各襲踪而
進若犯固原陝西遊兵即便掣回應援李祥衛勇馮禎
韓斌等各領兵於紅寺兒堡按伏姜漢戴欽藍海等兵
各於韋州鹽池石溝按伏環慶官軍移至萌城各休兵
秣馬以逸待勞曹雄相機調遣腹裏官軍據險以扼其
衝張疑以分其勢一面馳報安會靜隆官軍堅壁清野
勿露形跡多用鄉導指引藏兵於崖窰堡洞險要阨塞

之處伺彼分散搶掠出其不意發兵擊之敵既不得逞必將遁去曹雄陳善重兵衝其腹心又與徐謙遊兵俱襲踪而出比至紅寺兒石溝鹽池等處延寧環慶官軍分據營盤待其前鋒稍遠先後犄角夾而攻之陝西主將遊兵出其後背奮而逐之晝則選鋒以截其路夜則銜枚以劫其營彼深入疲弊又腹背受敵必然大遭挫衄若犯環慶則延綏遊奇官軍掣至紅德堡山城會合陝西遊兵尋襲截殺倘或事情緊急都督曹雄領兵

自三角城沙井溝而出寧夏主副將官兵馬掣至萌城
甜水堡以遏其破喪西走之勢敵既敗走其氣已奪諸
軍仍躡其後併力追勦至邊牆而止沿邊主兵將官閭
網保勦等以逸待勞或邀其中或截其尾以我四路應
敵之兵當彼千里趨利之衆豈有善歸之理如此庶可
振我國之威褫敵人之魄爲今之計似不出此然兵無
常形敵有萬變隨機運用難以預度因時制宜又在
各官再照延綏遊奇土兵既皆掣至西路其中東二路

城堡空虛倘敵乘隙而入爲患非輕已行延綏鎮巡官照例徵調大同遊奇官軍先期於交界去處駐劄敵果入套調來中東二路應援截遏如是敵衆俱在迤東近邊拆牆謀犯延綏地方即將本鎮遊奇兵掣回若事情緊急寧夏陝西遊兵俱應調去策應臨期斟酌定奪凡客兵所至之處在陝西地方悉聽署都督曹雄節制在寧夏地方聽總兵官李祥節制在延綏地方聽總兵官張安節制俱不許偏執違拗致悞事機除通行各該將

官查照依奉施行及行陝西巡撫都御史張泰前來固
原慶陽隨宜駐劄防禦臣遵照欽奉勅旨往來環縣韋
州居中調度外等因具本該通政使司官奏奉聖旨兵
部知道欽此欽遵抄出送司查得先爲預防邊敵事該
大同鎮巡等官與總制都御史劉宇奏本部議得即今
冰凍已堅敵衆勢必入套乘間爲侵竊恐難免合無鋪
馬齎文陝西等處總制都御史楊宜當先其未發行令
各鎮鎮巡等官督屬各要用心操練人馬振揚威武使

先聲有以奪敵之心如果侵犯跡露即便獎勵主客官兵隨宜調度何將使領某軍何軍使屯某地何地爲寇所必入當嚴兵以遏之何路爲敵所必歸當按甲以邀之務在計出萬全事無一失大挫其鋒圖成偉績下以副三邊之望上以紓九重之憂毋致疎虞有孤委任已經題奉欽依行令欽遵去後今該前因案呈到部爲照邊烽不靖動肆兇殘每冬涉水入套輒便深入陝西腹裏地方搶掠沿邊軍民連遭荼毒今總制都御史楊憤

彼猖獗之甚因畫戰守之謀叅詳奏內事宜其爲計慮亦既周悉本部難再別議但兵貴有名事當持重合無請勅一道仍鋪馬齎付楊務要仰思分閫之責俯念窮邊之憂凡有益於安攘悉依原擬隨宜調度惟在先事而備好謀而成使我國之威大振敵人之魄盡褫若彼潛伏河套不窺我邊亦毋輕易出兵以開邊隙仍行各該鎮巡等官各要同舟共濟併力協謀如大功克就則陞賞不遺倘事機有悞厥罪惟鈞緣係議勦邊敵及奉

欽依兵部知道事理未敢擅便正德元年十二月十八日本部尚書閻仲實等具題本月二十日奉聖旨禦防邊患應悉依楊一清籌策調度恁部裏便上緊差人鋪馬裏齎文與他知會欽此欽遵擬合通行爲此除外合咨前去煩照本部題奉欽依內事理欽遵施行

一爲預計兵機事

兵部覆於兵科抄出總制陝西延綏寧夏甘肅等處邊務兼督理馬政都察院左副都御史臣楊題據鎮守延

綏總兵官都督僉事張安呈切見近年以來敵衆驕橫肆志勢甚猖獗動輒深入腹裏諸鎮被其蹂躪地方盡皆殘毀未嘗有一挫彼鋒銳切齒含恨無所施爲且如弘治十八年十二月初旬套中走回人口傳報酋首會議每人殺羊一隻牽馬二匹前往迤西地方搶掠彼時得此消息欲集官軍乘夜出境撲搗巢穴破彼南侵西掠之勢但恐又有引惹邊釁之說有爲首尾之畏束手忍忿掣肘難行以故敵人得利而歸動搖内外言及於

此實可寒心若不預爲處置使之痛遭挫衄以回邊患
何時得息地方何時得寧合無將敵衆仍前恣意侵掠
不拘何鎮探聽聲息選定馬步官軍住守先差乖覺夜
不收出境密切哨爪敵兵遠近帳巢多寡果離邊牆一
二百里之遠的實回報然後將馬隊官軍分爲左右哨
掖步軍駕御兵車隨同出境挨邊劄營作爲家當聲勢
聯絡遙振兵威馬軍晝伏夜行徐徐前進約至其巢分
兵四面齊起驚擊散亂擒拿老小勦殺強壯邀趕生畜

縱有徼倖逃命脫走者冬則凍餓死傷夏則困渴疲敝自有不戰而亡且又致使深入腹裏搶掠之敵得知前後不顧急趨回營見其巢破營空妻子散亂無所顧藉生畜被刼無所收集加之腹裏按伏官軍追擊內外夾攻手足無措未免魂喪膽落號哭奔逃敵衆所顧戀者妻子生畜如此謀爲使再不敢返顧輕犯庶保內外軍民得安緣係預計兵機事理合行具呈乞爲叅詳可否明示施行等因到臣看得鎮巡延綏總兵官都督張安

呈稱近年達衆勢甚猖獗動輒深入腹裏蹂躪地方未嘗一挫其鋒要待將來敵衆仍前肆意侵掠探聽聲勢選定馬步官軍乘夜出境撲搗巢穴使之手足無措魂散膽落再不敢輕犯邊境又恐有引惹邊釁之說畏首畏尾掣肘難行一節切緣前項敵衆自弘治十三年延綏大同官軍失利之後志驕氣橫肆無忌憚弘治十四年深入陝西腹裏殘害生靈動以萬計弘治十八年宣大遊兵全軍覆沒又河凍之後連年窺伺陝西既未遭

挫必無懲戒今冬踏冰入套之舉難保必無既入河套
必不安靜臣方部署將士振揚威武已將沿邊直抵腹
裏分爲四路布置主客官軍相機邀截及具題外但兵
少備多未免以一當十出奇制變似不得已前項撲搗
巢穴之議不爲無見臣非不知來戰去守乃禦敵之常
道窮兵黷武非聖王之本心緣商高宗之伐鬼方唐太
宗之擒頡利是非薄伐昭然可知况河套本我內地而
彼據以爲巢由是以窺我近邊犯我內郡此正田中之

禽利用搏執固非稱兵於陰山之窟濺血於不毛之地
喜功好大者之所爲也臣愚以爲今冬深河凍敵果入
套宜照兵部奏行事理徵調宣大二鎮遊奇官兵前來
延綏中東二路駐劄並聽總兵官張安節制若止在套
駐牧不曾擁衆內侵我則嚴兵自守決不輕挑強敵自
起釁端如是仍前深入固慶等處搶掠合無行令延綏
鎮巡官一面選帶乖覺夜不收分投出境哨探敵營遠
近衆寡一面會合主客官兵預先分布逼近敵營城堡

待哨探回還如在一二百里之間有機可乘原擬沿邊中路邀擊之兵照舊不動以延綏東路叅將時源領本鎮三路臣近日挑選先鋒奇兵官軍三千員名爲戰兵總兵官張安領本鎮選定頭等官軍三千員名次之以爲中軍大同遊奇兵爲左右二哨宣府遊奇兵又次之爲兩覆太監劉保都御史文貴領本鎮無馬并步隊官軍於牆外二三十里列車營爲家當分布停當晝伏夜行各相去二三十里擇形勢利便之地爲營以待務使

聲勢連絡後騎相望前鋒戰兵既近賊壘奮勇疾進衝其腹心寇既潰亂捨其羸老而戮其壯健奪其鎧馬而縱其牛羊大同之兵堅正嚴備不許貪利輕動如前鋒勝負未決進爲聲援待其既回以爲翼衛彼若糾聚餘孽追襲我軍張安合大同之兵專爲殿後宣府官兵相機爲援我雖退而兵漸增彼既遠而勢自屈前軍勞而退則先行使無繫累後軍逸而回則殿後使有餘力如此布置較之先年出境部分疎遠孤兵無繼迄無成功

者不同彼既千里趨利日久疲敝聞我傾其巢穴必自
遯歸我腹裏之兵躡之中路之兵劫之沿邊之兵又夾
而邀之彼戀巢之心既勝欲戰之志不堅必然潰敗比
至套中見其妻孥傷殘褫魂破膽振中國之威洩生民
之憤安邊制敵之計莫快於此昔者孫臏直走大梁而
解邯鄲之圍攻其所必救古人遺法具在顧用之者何
如耳但兵貴神速機防先露進止之間不容髮若待臨
期奏請定奪誠恐緩不及事如蒙乞勅兵部詳議倘有

可采作急行臣及延綏鎮巡官密切會議相機而動必期成功若套人勢重兵力不敵或賊營迂遠勢難輕進機無可乘照常戰守不敢輕舉妄動以貽後艱等因具本該通政使司官奏奉聖旨這本所言禦敵方畧兵部便看了來說欽此欽遵抄出送司案呈到部看得陝西等處總制都御史楊奏稱敵衆頻年入寇未嘗一遭挫衄以此志益驕橫恣行侵掠沿邊地方盡被蹂躪今冬河凍入套若再擁衆內侵差人出境密切哨探賊營遠

近多寡欲要會合主客官軍部分將領駐劄要害選鋒
潛行直搗其巢待敵聞知遯歸又令腹裏按伏官兵追
擊夾攻使其進退驚惶坐見疲敝以致邊患永絕如止
在套駐牧不敢倡亂及兵力不敵賊營險遠仍前照舊
戰守因反覆問難備陳方畧仰冀聖明採擇施行一節
為達衆近年以來動輒深入腹裏殘害我生靈致勞官
軍西征北戰曾無虛歲罪惡已盈神人共憤今河凍入
套則窺伺固慶等處之謀勢恐難免今都御史楊慮其

將來為患不已邊境無時可寧欲要糾集大兵乘間掃穴其所以振驚羶裘之心發舒華夏之氣誠足為快及照奏內區處事宜亦既周悉詳其論議似可求成但兵貴出於萬全事須圖厥所終雖取子必入虎穴尚有遺謀而探珠幸值龍眠亦為危道今遠離邊城懸軍敵境少有蹉跌關係非輕况臨機制變非臣等所能遙度合無本部仍鋪馬齎文本官將奏內事情再加詳議審已量敵長慮却顧如果事機可乘筭無遺策兵力可勝保

無後艱聽依原擬徑自施行大興神武之師用紓疆場之患若是哨探不的險遠難進彼無可圖之釁我有自危之形只合振揚軍威激勵將士候彼深入分兵邀擊以期成功務須不見是圖為謀孔臧以副重託毋得率意輕動致有疎虞仍行大同等處總制都御史劉宇及宣大二鎮鎮巡官員各將遊奇官軍整點齊備候陝西總制有事徵調即便依期督發前去共濟邊務毋得遲延悞事自干憲典緣係總制官員奏議出境勦寇事宜

及奉欽依這本所言禦寇方畧兵部便看了來說事理
未敢擅便正德元年十二月初九日本部尚書閻仲實
等具題本月十一日奉聖旨是閩外之寄鄉等所專出
奇制勝事難遙度務要計出萬全以除邊患毋致疎虞
欽此欽遵擬合通行除外合咨前去煩照本部題奉欽
依內事理欽遵施行

一爲遵明詔更置將官以甦久疲邊人事

兵部覆本部送於兵科抄出總制陝西延綏寧夏甘肅

等處邊務兼督理馬政都察院左副都御史楊題行據
鎮守陝西署都督僉事曹雄呈准陝西等處地方都察院
右副都御史張泰手本行據陝西都司掌印都指揮僉
事房懷呈稱會同陝西布按二司掌印左布政使胡富
按察使謝瑩查議得洮岷河州西固城階文五處地方
切隣邊境番賊先年不時侵犯陸續奏設守備官各一
員職專操練軍馬撫治番夷保障地方近年以來仗賴
朝廷恩威諸番順服但邊人居處進退無定反覆不常

禍患難保况岷州相離階州五百里文縣七百里西固城三百里洮州一百餘里河州五百里河州直抵階文一千二百餘里且又山溝陡峻道路崎嶇若將各該守備官員盡行裁革止設叅將一員常在岷州駐劄邊備副使常在河州駐劄有事公同計處倘遇有警言直待呈報各官方纔調用人馬不惟緩不及事抑恐所喪滋多其稱前項守備官每人常帶家屬四五十口莫肯自出已財養贍分外供億何勝其繁甚有不守法度肆爲剝

削漁獵誠有所見但征勦截殺之際若非親人跟隨不可合無將各官隨帶家人量為查革各止許存留十數名跟用其餘俱發回原籍隨住各官仍照舊存留於各地方守備若有人口過多甚或廢弛邊情剝削軍士等項姦弊聽邊備官用心訪察具實詳呈撫按衙門叅奏拿問庶幾不失事體且免後艱呈乞定奪施行等因據此看得陝西都布按三司掌印官都指揮僉事房懷左布政使胡富按察使謝瑩等會同查議得前項事情誠

爲有見原設守備官員委的難以裁革備由用手本前去煩爲徑自回報施行等因准此案查先抄蒙總制陝西延綏寧夏甘肅等處邊務兼督理馬政都察院左副都御史楊鈞帖前事已經計議去後今准前因理合備由呈乞照詳施行等因據此案查先准兵部咨前事看得巡按陝西監察御史杜旻奏稱洮岷河州西固階文五處地方先年因諸夷入境侵掠各設守備官一員使之控制今諸番俱已向化畏威要將各守備官盡行裁

革另設叅將一員分守一節具見本官省官惜軍之意
但前項地方俱各切隣番境守備官員未審應否裁革
擬合查勘為此合咨前去煩查前項各該地方守備官
員即今應否盡行裁革止設叅將一員揆之人情事體
有無經久利便逐一查明咨報以憑上請定奪等因備
咨准此已經備行陝西鎮巡官員查勘議處去後今准
前因看得巡撫陝西都御史張泰行據三司等官議稱
岷州相離階州五百里文縣七百里西固城三百里洮

州一百餘里河州五百里河州直抵階文一千二百餘里山溝陡峻道路崎嶇若將各該守備官員盡行裁革止設叅將一員常在岷州駐劄邊備副使常在河州駐劄倘遇有警直待呈報各官方纔調用人馬緩不及事要將各官照舊存留守備但隨帶家人止許十數名跟用其餘發回原衛各官若仍舊存留人口數多剝削軍士等弊聽邊備副使指實具呈撫按衙門叅拿一節切緣前項地方密邇諸番深山大谷恃險難制先年不次

糾集醜類入境侵掠動調官軍誅勦經年方得寧息近
雖不敢恣肆桀驁之性叛服不常撫馭稍有失宜難保
不復為患巡按御史杜旻所奏乃省事惜費以甦邊人
之意但干碍地方事體重大况先朝設立守備官員似
有深意行之年久若便議令裁革恐貽後艱臣竊謂任
法不若任人任得其人官雖多不為害任非其人委的
有損無益近年守備官員不止家口衆多分外供億中
間剝削軍士侵尅糧賞交通番夷勾引邊患者實不為

無藉以安邊反以擾人誠有如御史杜旻所言臣訪查得守備洮州都指揮僉事趙寧貪而且老懦而無爲人情稔熟事多掣肘守備岷州署都指揮僉事閻縉才雖通敏性實虛浮行事乖方下人不附此二人者委的擁虛坐食廢事虐人非惟無益邊備且恐貽患地方所據前項守備官五員固難裁革其不職官員則當革罷內趙寧年力已衰難再別用閻縉年力精壯猶堪領軍如蒙乞勅兵部再議奏請合無將前項守備五員俱不

必裁革內將洮州守備都指揮趙寧岷州守備都指揮
閻縉俱各革退趙寧令其替職閻縉令回原衛聽候別
用聽臣會同陝西巡撫於都司各衛官中推舉有才幹
有行止知番情者具奏擢用守備前項地方仍通行各
該守備官隨帶家人止許存留十數名跟用其餘俱發
回原衛若有仍舊存留人口數多剝削侵尅交通番夷
等弊聽巡按御史分巡邊備等官舉劾叅拿如此則事
無紛更人無勞擾後艱可免實為便益等因具本該本

部官欽奉聖旨兵部看了來說欽此欽遵抄出送司案
查先該巡按陝西監察御史杜旻奏前事已經查勘去
後今該前因案呈到部看得陝西總制都御史楊奏稱
查勘過洮岷河州西固階文等五處地方密邇諸番叛
服靡常原設守備官員難以裁革但守備洮州都指揮
趙寧岷州都指揮閻縉俱各不職欲要革罷另行推用
一節緣前項各該地方守備官員既該總制官員勘稱
裁革不便合無依其所奏本部行移本官除將趙寧行

令替職閻縉令回原衛仍另推相應官員前來上請簡用其餘俱各照舊存留守備其稱各官家屬衆多未免分外供億甚又肆意侵漁潛交番賊誠為貽患地方相應禁治亦合通行本官轉行前該守備各官今後跟用家人止許存留十數名在彼其餘俱發回原衛不許仍前多帶以致供應太繁軍士受害及敢有侵剋交通等情聽總制巡按等官指實叅奏拿問決不輕貸緣係總制官議奏存留守備官員及奉欽依兵部看了來說事

理未敢擅便正德二年正月初二十六日本部尚書閻仲
實等具題本年閏正月初一日奉聖旨是欽此欽遵擬
合就行為此合行移咨前去煩照本部題奉欽依內事
理欽遵施行

一爲急缺領軍官員事

兵部覆本部職方司案呈奉本部送於兵科抄出總制
陝西甘肅延綏寧夏等處邊務兼督理馬政都察院右
都御史楊題查得寧夏管領土兵都指揮僉事韓斌近

該巡按陝西監察御史邢纓奉都察院勘合劄付為捷
音事行提本官與守備焦洪併問去訖案查先為慎固
地方以遏邊寇事准兵部咨該本部題該鎮守寧夏地
方都知監太監葛全等題前事本部看得寧夏鎮巡等
官太監葛全等奏稱花馬池等四營俱各隔遠備禦等
項人馬不多往往被寇擁衆深入毒虐要將寧夏義勇
土兵內挑選三千員名關給馬匹令靈州土官都指揮
韓斌統領清水營按伏遇警言會合截殺一節緣花馬池

委係敵衆經由腹內喉襟之處今既該各官會奏前來
必其計籌停當有益邊方合無准其所奏本部仍行各
官照數挑選精銳義勇土兵三千員名給與馬匹着令
都指揮韓斌統領依期專在清水營按伏遇警往來相
機策應務要撫恤軍士如法操練不許虐害致令失所
其缺少馬匹仍行都御史楊查照給用若果十分不敷
明白奏來以憑定奪等因題奉欽依備咨前來查得前
項義勇士兵已該寧夏鎮巡官挑選精壯三千員名欽

遵行委都指揮韓斌統領及馬匹臣陸續處置給領將
及三千之數邇年照依兵部原擬在於清水營按伏遇
警會合主客官兵截殺外今該前因切緣清水營在於
寧夏橫城之東興武營之西最為孤懸要害敵衆出沒
必由之地自設前項人馬以來頗壯邊城聲勢今敵衆
在套未出正當緊關隄備之際縱使河開出套遇冬難
保不來原設領軍官員既已緣事被提未知何日完結
雖委官暫領終是權任不專難責成效臣又訪察得都

指揮韓斌雖才識通敏有治事之能而性資嚴刻非統馭之器頃緣虐用其下以致土人奏訴違法事情多端見該兵部奏行勘問未結雖虛實未可知但彼為土官而失土人之心至於如此安望其樂為効用以成戰伐之功哉必須另擇將官統領庶使此軍不為徒設竊見寧夏衛指揮使新陞都指揮僉事仇鉞出自將門素諳戎務驍勇善戰曾立奇功寧夏一鎮武臣號為出色相應委用但所領官軍三千員名與各鎮遊奇兵事體不

異況今三邊多事前項土兵若得人教養操習豈徒清水營按伏花馬池策應而他鎮有事亦可備緩急之援若非稍加優遇不無事重權輕如蒙乞勅兵部叅詳議處合無乞將仇鉞具奏量與將官名目請勅統領前項義勇士兵三千員名令其用心操練撫卹仍照原擬遇冬分布清水營按伏花馬池靈州一帶地方有警俱聽鎮巡官調遣策應訓練既精各鎮有事亦可徵調應援如此則軍威增重軍容改觀邊方大計不為無補韓斌

待事完如果無礙另行推委管理別項官軍庶使土官與土人不致互相猜疑實為便益等因具本該本部官欽奉聖旨兵部知道欽此欽遵抄出送司案查先為慎固地方以遏邊敵事該寧夏鎮巡官奏稱花馬池等四營俱各隔遠備禦等項人馬不多徃徃被敵擁衆深入毒虐要將寧夏義勇土兵內挑選三千員名關給馬匹令靈州土官都指揮韓斌統領清水營按伏遇警會合截殺本部議得花馬池委係敵人經由腹裏喉襟之處

今既該各官會奏前來必其計籌停當有益邊方合無
准其所奏仍行各官照數挑選精銳義勇土兵三千員
名給與馬匹着令都指揮韓斌統領依期專在清水營
按伏遇警往來相機策應已經題奉欽依內行令欽遵
去後今該前因案呈到部看得陝西總制都御史楊奏
稱寧夏管領土兵都指揮僉事韓斌才識優於治事統
馭非其所長近因虐用下人以致奏訴違法事情多端
雖勘問未結而人心已失難再委用及訪得都指揮僉

事仇鉞諳練驍勇俱在一鎮武臣之右欲要本官量加將官名目請勅令其代替韓斌管領前項土兵以備按伏徵調一節為照前項土兵俱係挑選精銳人數然須統領得人庶幾操縱有法緩急可用既該總制官員奏處前來必有斟酌停當合無本部依其所擬將都指揮僉事仇鉞改充遊擊將軍候命下之日請勅一道齎付本官代替韓斌統領前項土兵常年依期分布清水營按伏如遇花馬池靈州一帶地方有警俱聽鎮巡官調

遣策應防禦邊寇務須撫卹軍士如法操練期副委任
不許殘虐致令失所責既有歸罪其容違仍行總制官
員及寧夏鎮巡等官一體知會欽遵施行緣係定奪領
軍將官及奉欽依兵部知道事理未敢擅便正德二年
二月十八日本部尚書閻仲實等具題本月二十日奉
聖旨是仇鉞着充遊擊將軍寫勅與他欽此欽遵擬令
通行除外合咨前去煩照本部題奉欽依內事理欽遵
施行

關中奏議卷八

欽定四庫全書

關中奏議卷九

明 楊一清 撰

總制類

一爲激勵土兵事

兵部覆於兵科抄出總制陝西延綏寧夏甘肅等處邊
務都察院左副都御史楊一清題查得管領蕃人陝西
都司秦州衛指揮同知郭遡原籍陝西平涼府靜寧州

人成化四年間為因蕃人滿四反叛石城應例招集土兵自備鞍馬報効殺賊及親入賊巢招降叛賊節次有功陞授錦衣衛所鎮撫職事願告改秦州衛歷陞今職
通年管領蕃人并招募民壯等項土兵遇冬於固原等處備禦有警各該總督總制巡撫等官調往延寧洮岷
大同等處勦殺邊敵屢立奇功弘治十八年十二月內
達衆數萬深入陝西靜寧隆德地方搶掠出境鎮守署
都督曹雄委令跟隨遊擊將軍陳善前去寧夏韋州小

鹽池一帶邀截歸路彼時延綏遊奇土兵與寧夏主副將官所領官軍共一萬五千餘員名各因敵勢重大相顧莫敢發兵本官獨領家人土兵追趕至地名狼巴井斬獲首級二顆至今尚未論功陞職臣切見本官膽氣過人起自編氓陞授軍職管領土兵三十餘年大小戰陣數十餘次敢勇當先人所共知近年敵衆侵犯固原恒問郭邈在否是其威名雖敵人亦熟聞之緣各處領軍官員曾舉將才者多蒙推陞署都指揮職事本官歷

任年深効勞最久弘治十三年間節該兵部推訪才勇可取官員亦與其列獨未嘗一蒙拔擢人共惜之況其所管土兵一千餘名調往各鎮截殺與彼處領軍都指揮等官不相統屬職任獨輕難以行事今敵衆在套寧夏甘涼俱有聲息正在激勵土兵之際如蒙乞勅兵部查訪本官如果才勇可取不為常例量與署職照舊領管蕃人招募民壯聽臣隨宜調遣各鎮應援截殺則凡土官土兵感激奮發咸懷赴闕之志矣等因具本該本

部官欽奉聖旨兵部知道欽此欽遵抄出送司案呈到
部看得總制陝西都御史楊奏稱秦州衛指揮同知郭
遡起自編氓歷陞今職管領土兵三十餘年屢立奇功
及稱遇有警調職輕不便行事而套衆方謀入攻兵將
尤宜激揚欲將本官量加都司署職照舊領兵截殺一
節為照指揮郭遡既該總制官員奏保前來必其勤勞
懋著任用克堪况領兵聽調委須官職稍重方易責成
合無本部依其所奏不為常例將本官量陞都司署職

令其照舊管領蕃人民兵聽總制官員調度殺賊仍行
總制轉行本官今後益要感恩思奮用圖報稱毋得官
成自怠備事招尤緣係總制官員保陞將官署職及奉
欽依兵部知道事理未敢擅便正德二年閏正月十六
日本部尚書閻仲實等具題本月十八日奉聖旨是郭
遡准陞陝西都司署都指揮僉事欽此欽遵擬合通行
除外合咨前去煩照本部題奉欽依內事理欽遵施行
一爲經理要害邊防保固疆場事

兵部覆本部職方司呈於兵科抄出總制陝西延綏寧夏甘肅等處邊務兼理馬政都察院左副都御史楊題近准兵部咨該本部等衙門題該本部題先該臣題前事本部會同太師兼太子太師英國公張懋吏部尚書焦芳等議擬上請奉聖旨是都准議行欽此欽遵備咨到臣仰惟聖明軫念關中重地采納臣下議奏花馬池興武營等處要害地方修濬牆塹添設衛所等事俱依擬施行一勞永逸兵民幸甚查得內一件臣原奏要將

花馬池守禦千戶所改設寧夏後衛興武營添設守禦千戶所將選定新舊招募土兵起調前去入伍食糧永遠操備但合用旗軍五千名今止挑選得四千名尚欠一千名及查得花馬池守禦千戶所額設軍人舊欠三百六十四名俱應撥補合無照依榆林靖邊等衛并陝西苑馬寺事例將陝西西安等八府正德元年以前清出該解南方軍人免其發解各改編前項新設衛所應當軍役待軍伍數足具奏停止會官議得前項地方委

係要害處所必須兵力強盛庶克保障今總制官員奏
要改設衛所委的事體相應合無令兵部仍行本官將
花馬池守禦千戶所改立寧夏後衛興武營添設守禦
所文職等官并印信銅牌行各衙門照例銓選奏請給
用仍行陝西清軍官將正德元年以後清出雲南貴州
兩廣湖廣軍人改編今設衛所着役數足奏請停止其
餘議處事情悉令查照原擬施行務期威武克振邊方
有賴等因查得改編舊例止是兩廣雲貴四川湖廣等

邊衛弘治十三年間該榆林巡撫都御史王嵩題該兵部議擬合無依其所奏不拘常例行移陝西清軍御史并布按二司清軍官員將延安慶陽西安三府所屬見今清出在官該解雲南兩廣福建湖廣江浙各都司衛所軍役不分例前例後逐一查勘明白免其起解原衛俱解延綏巡撫衙門改編榆林衛撥去各營堡操備仍行各軍原衛開豁名伍等因題奉孝宗皇帝欽依是欽此弘治十七年間為修舉馬政事該臣奏稱陝西苑馬

寺缺人牧馬該本部議擬題准將陝西各府弘治十六
年以前清出江南衛所軍人例該存留附近衛所者俱
解陝西苑馬寺牧馬俱經通行欽遵外切緣南北衛所
軍伍俱不可缺前項奏行事例一則因邊衛缺軍防守
一則為邊方缺馬征戰況北人應當南軍畏其烟瘴炎
熱終是不肯應役州縣清解雖勤而衛所空虛如故徒
為里書官旗漁獵之資以此較彼權其輕重利害改編
之計本非得已今苑馬寺牧軍頗勾孳牧花馬池興武

營地方添設衛所乃邊方兵勢強弱腹裏民生安危所繫尤重且急但今次議奏止開將正德元年以後清出雲南貴州兩廣湖廣軍人改編今設衛所着役查得陝西各府並無兩廣軍人其雲南貴州湖廣三處先曾清出者節經改編去訖雖有未盡數亦不多前項新設衛所終難填實如蒙乞勅兵部再議合無比照榆林奏行事例將陝西各府正德元年以後清出雲南貴州四川湖廣江西浙江等都司衛所軍人該起解者免解原衛

改編新設寧夏後衛及興武營守禦千戶所共轄一千
名停止仍行原衛將名伍除豁如此庶幾威武振揚邊
方有賴而腹裏人民獲安矣等因具本該本部官欽奉
聖旨兵部知道欽此欽遵抄出送司查得先為缺軍防
守邊備事該巡撫延綏都御史王嵩奏訪得延安慶陽
西安三府所屬人民中間多有貴州雲南兩廣福建江
西浙江湖廣四川南直隸等處都司衛所軍役清出見
解并遠年無勾等項軍士照名改調本邊操備等因該

本部依擬不拘常例行移陝西清軍御史等官將延安等三府見今清出在官該解貴州雲南兩廣福建湖廣四川江西浙江各都司衛所軍役不分例前例後逐一查勘明白免其起解原衛俱解發延綏巡撫衙門斟酌照名改編榆林衛着役操備仍行各軍原衛開豁名伍造冊申繳本部備照其原衛有人應當不曾發冊清勾者不許一概改編等因題奉孝宗皇帝聖旨是欽此已行欽遵外又查得為經理要害邊防保固疆場事該總

制陝西都御史楊題稱要將陝西延安等八府正德元年以前清出該解南方衛所軍人改編寧夏新設衛所應當軍役該本部等衙門會官議擬仍行陝西清軍御史等官將正德元年以后清出雲南貴州兩廣湖廣軍人改編今設衛所着役數足奏請停止等因題奉欽依已經通行欽遵去後今該前因案呈到部看得總制陝西都御史楊題稱先因花馬池等處地方缺軍防禦奏要將陝西西安等府清出正德元年以前該解南方軍

士通行改編前項新設衛所已蒙該部奏奉欽依准擬
但各府原無兩廣軍人其雲貴湖廣者節經清解去訖
改編之數終亦不多欲要比照榆林事例將前項府分
正德元年以後清出解雲貴四川湖廣江浙等都司衛
所軍人俱免起解改編寧夏新設衛所共轄一千名數
足停止仍將原伍開除一節合無依其所奏本部仍行
陝西清軍御史等官查照前該奏擬衛分但有正德元
年以後清出原係南方軍士例該起解者俱令改編今

設寧夏等衛所轄足一千名數照舊停止仍將已改編者轉行原衛各將名伍開豁免致再行勾擾緣係總制官員奏要填實邊軍及奉欽依兵部知道事理未敢擅便正德二年閏正月三十日本部尚書閻仲實等具題本年二月初二日及奉聖旨是欽此欽遵擬合通行除外合咨前去煩為轉行彼處清軍等官照依本部題奉欽依內事理欽遵施行

一爲乞取醫士治療病疾事

禮部覆該本部祠祭清吏司案呈奉本部送於禮科抄出欽差總制陝西延綏寧夏甘肅等處邊務兼督理馬政都察院右都御史楊奏臣元氣素弱舊有目疾少壯之時無歲不發中年以來血氣既衰漸成昏眊視物如霧十步之外不能辨人近於正德元年十一月間前往寧夏花馬池等處地方閱視邊兵野行草宿為風沙所傷回至環縣目疾大作見風日則刺痛如割閱文字則涕淚交流兼以風熱上攻耳鳴頭暈腰膝無力行立艱

辛臣之疾勢如此然而未敢言去者以受恩深重茫無寸補近蒙陛下加以崇秩假之重權寇患未消正臣子鞠躬盡瘁之日及又奉勅經理寧夏延綏一帶邊防責任重大分當以身徇國豈敢遽求便安但察臣脉候表裏俱病久而不治將成痼疾訪得陝西邊方多無明醫雖有一二頗通醫業之人緣南北風氣不同稟賦各異治療失宜雖多無効臣在江南素用鎮江衛醫士睦幹藥餌取效恒多臣是以不避斧鉞冒昧上陳伏望聖慈

憐臣身在邊方乞勅該部轉行巡撫南直隸都御史行
令鎮江衛將醫士睦幹督發前來隨臣軍門治療前疾
痊可方竭股肱之力以報陛下生成之德等因具奏奉
聖旨該部知道欽此欽遵抄出送司案呈到部看得總
制陝西延綏寧夏甘肅等處邊務兼理馬政都御史楊
奏稱舊有目疾漸成昏眊兼以風熱頭暈將成痼疾素用
鎮江衛醫士睦幹藥餌多効乞行巡撫南直隸都御史
行令鎮江衛將醫士睦幹督發前來軍門治療前疾痊

可方令回還一節切惟三軍之司命全在乎主帥一身之運用莫先乎目力主帥安危關係甚重合無准其所奏但巡撫南直隸都御史今已取回本部移咨都察院轉行巡按直隸監察御史行令鎮江衛督發醫士睦幹前去總制陝西等處邊務都御史楊處調治前疾俟痊之日令其回籍如此則朝廷軫念邊方之計切而優禮重臣之典隆矣緣係乞取醫士療疾及奉欽依該部知道事理未敢擅便正德二年二月十一日具題十三

日奉聖旨是欽此本年二月十五日咨都察院轉行訖
一爲預處儲蓄以安邊固本事

戶部覆陝西清吏司案呈奉本部送於戶科抄出欽差
總制陝西延綏寧夏甘肅等處邊務兼督理馬政都察
院右都御史楊題行據陝西布政司呈查得弘治十八
年西安延安鳳翔慶陽四府災傷遇例蠲免除豁過稅
糧馬草延綏一帶糧料一十六萬七千八百六十二石
零草四十三萬一千四百一十九束零寧夏一帶糧料

三萬九千二百九十七石六升草一十萬九百八十三
束零甘肅一帶糧料八萬七千六百二十七石五斗六
升零固靖環蘭洮岷西固城糧料一十二萬六百三十
四石二斗草二十一萬六千七百九十八束零存留糧
料二十三萬一千五百石零草五千八百餘束及據本
司呈稱查得本司廣積庫各項銀兩除呈蒙巡撫巡按
案驗批准解贖補災免糧數并收買銅料鑄錢科舉應
用原額年例給賞軍士冬衣布花官軍折俸銀兩寄庫

馬價及戶部送發寧夏甘肅糴糧銀兩外見在止有夏
秋糧餘價缺官皂隸糴糧支剩農桑絲綿折銀并本庫
陸續放出餘銀查算各項共二千四百二十二兩五錢
四分四釐四毫八絲六忽及戶部送到賑濟銀二十萬
兩內除脩邊十萬兩環慶糴糧二萬兩賑濟用過九千
七百六十一兩二錢解去平涼府准折祿米一萬三千
三百七十三兩二錢外見在五萬六千八百六十五兩
六錢緣由前來案呈先准巡撫延綏本院右副都御史

文貴咨爲走回男子傳說寇情事開稱敵衆入套動調
主客兵馬數多查得本鎮各倉見在糧料草束供給主
兵頗勾支用若是供給客兵誠有不敷合無一面先將
陝西布政司廣積庫收有稅糧等項銀兩酌量動支委
官領解前來分投派往延安府地方收買糧料草束運
赴附近衝要屯聚客兵按伏營堡上納一面行陝西布
政司管糧并分巡分守等官將各年拖欠之數上緊催
來以濟急用一面移文戶部請益銀鹽以補缺乏等因

爲照延綏一鎮逼臨河套敵衆首先窺伺前項年分腹裏災傷蠲免起運糧草數多及寧夏甘肅固靖環蘭洮岷等衛俱係防邊處所原額應徵起運糧草既已蠲免除豁必須措置補數已經節行該司查處去後今節據前因除支銀糴買及催徵稅糧另行外會同巡撫陝西本院右副都御史張泰議得陝西西安等八府人民額徵糧草供給陝西延綏寧夏甘肅四鎮官軍人馬支用若外無寇戎之警內無水旱之虞則一歲之入自足以

供一歲之用奈何近年以來邊境騷東西侵擾動調客兵往來應援供億之費動加數倍會計所儲在在不足節該鎮巡等官具奏荷蒙皇上軫念邊方二三年間運送官銀多至五六十萬餘兩開中官鹽二百萬引但分給四鎮不見其多兼且地方連年薄收米價高貴發銀易買較之先年僅得一半然各該邊倉自是稍有積蓄相兼歲徵之數足可支持不意弘治十八年西鳳延慶四府大遭旱荒人民缺食流徙在途遠近動搖方賑

恤撫安之不暇豈敢照常催科仰荷聖恩將勘實災傷
應徵起存稅糧一體除豁小民始有生意地方獲安然
糧草之出於民者固已蠲除而兵馬之食於官者不可
減免遂令前項開中糴買之儲不足以備災傷蠲免之
數而倉場所入不償所出漸至空虛總計各邊除豁起
運稅糧馬草若論糴買用銀將及四十萬兩而存留之
數不與焉且陝西雖云八府而財用所出西安一府實
當其半西安既有全災七府全收不足以補况延慶鳳

翔三府亦復有災餘四府雖不曾作災亦非全熟勢難
通融撥補近因敵衆入套延綏守臣不次移文告乏雖
行布政司將西鳳等八府在庫官銀酌量陸續解運補
數與戶部發到預備糴糧賣鹽銀兩俱送各邊巡撫衙
門轉發彼處管糧官員招商糴買分發緊要倉場備用
又將布政司收貯招納冠帶農民等項銀兩支出分派
固慶洮岷兵備邊備副使等官斟酌糴買糧草及折支
官軍俸糧大約所補不過十之三四而司府庫藏亦漸

空虛其存留糧料草束俱係歲用不可缺之數又各無從措補今陝西布政司查報在庫銀兩除各項動支及賑濟馬價二項外所剩官銀止有二千四百餘兩及查賑濟銀二十萬兩除奏准脩邊十萬兩及已支賑濟糴糧外見在止有五萬六千餘兩夫以堂堂巨省而匱乏至此言之可為寒心查得先為旱災救荒等事該巡撫都御史張泰巡按監察御史邢纓會同奏要將山東河南起運折糧銀借支四十萬兩贍補前項災免糧草該

戶部議看得山東河南起運銀兩俱係供給京儲及宣大二鎮之數見今大敵在邊尚未遠遯萬一有警將何撥補訪得靈州等處大小鹽池係天產美利不勞人力其出無窮其課易辦合無行移巡撫都御史張泰查前項鹽課除近日開中買馬二十萬引外果有羨餘作急議擬上請盡數招商中納糧米助邊應用等因題奉欽依備行前來查得靈州大小鹽池原額鹽課共一萬四千三百三十七引舊例每引納銀一錢五分每年止該

銀二千一百五十兩有餘輪年分送延寧二邊買馬近該臣議奏量增課程新舊共五萬九千三百三十七引每引納銀二錢五分為因行鹽路狹鹽利少通正德元年分二池除舊引外共支放過新引二萬四千九百九十八道該銀六千二百四十九兩五錢緣前項鹽課雖蒙送發二十萬引前來止可收貯遞年陸續招商挨放若以正德元年所放新引計之多則十年少則六七年二十萬引之鹽方可放盡豈有羨餘招商糴糧况所收

銀兩查有兵部題奉孝宗皇帝欽依陝西茶鹽易馬備邊不許別項奏討事例擅難別項動支所據前項年分蠲免過起存稅糧馬草委的無從措置補完原數使寇知悔禍不來犯邊地方收成幸得全稔則以倉場見在之糧草支持主兵以庫藏見有之銀兩及開中未盡之引鹽陸續招商兼催徵拖欠逋賦輸納當年稅糧亦足勾用但敵情難測萬一有警未免徵調客兵臨期招買不出雖悔何及又恐年歲似前災傷倉庫既空賑濟轉

輸兩無所賴民窮盜起為患何可勝言臣等俱有地方
重寄今若不言他日誤事罪將焉逭查得先為急處救
荒事准戶部咨該本部等衙門會題該臣題前事會官
議擬內一件聽缺知印承差照依歷役年限納銀多寡
數目悉依原擬施行并農民願納銀兩叅充知印承差
吏典者仍查照前例俱通行各布政司及順天應天南
北直隸各照例收銀類總解部轉發陝西布政司支用
候年穀頗熟邊方稍寧之日停止又一件舍餘民人先

年上納軍職并今願告上納者悉照所擬施行至指揮使而止舍餘就於原衛民人於地方衛所帶衛閒住俱聽巡撫衙門定奪銀兩類解戶部轉發例至正德二年停止又一件上納陰陽醫學僧道官俱依擬施行各處軍民客商并仕宦子孫不係見有職役者納銀六十兩授正七品散官五十兩授正八品散官四十兩授正九品散官二十兩者冠帶榮身其銀兩係兩京順天應天地方赴戶部及南京戶部各布政司并直隸地方赴各

司府州上納類解戶部轉發例至年穀頗熟邊方稍寧之日停止等因題奉欽依備咨通行外近據陝西布政司呈稱查得止是收過本省上納陰陽僧道義官知印承差農民銀二萬六千六百六十九兩並無各布政司并南北直隸收解銀兩及戶部亦無轉發并原開軍職無人告納銀兩緣由前來切緣前例俱因陝西地方奏開通行江西浙江四川湖廣河南及南北直隸所得銀兩類總解部若依原擬解發陝西支用事體相應及又

查得近為處置邊儲預防邊惠事亦該巡撫都御史張
泰會同巡按監察御史邢纓奏要將陝西布政司查出
成化年間兩淮山東運司餘剩未中殘鹽一百二十一
萬五千七百八十六引未填勘合一百二十一道另定
價值量為減輕招商報中糴買糧草未奉明示如蒙伏
乞聖明俯念陝西三邊重鎮地方安危所係乞勅戶部
查照議奏合無將陝西奏開救荒通行江浙四川湖廣
河南南北直隸事例所得類總解部銀兩照依原擬盡

數查發陝西布政司收貯分給陝西延寧甘肅四鎮糴買糧草補完弘治十八年災傷蠲免之數仍乞將近日議奏開中報剩殘鹽早為定奪行令陝西布政司招商報中倘前項殘鹽有碍惟復仍開淮浙四川等處課鹽五六十萬引招商或收納銀兩以實庫藏或上納糧草以益邊儲臨期酌量地方豐歉施行如此則非惟邊方儲蓄有所仰賴不至缺乏且使腹裏人心有所係屬不至動搖實為便益等因具本奏奉聖旨戶部知道欽此

欽遵抄出送司案呈到部看得所奏要將浙江等處司
府上納陰陽僧道義官知印承差等項解部銀兩查發
陝西布政司收貯分給延寧甘肅糴買糧草并成化年
間奏開兩淮山東運司餘剩未中殘鹽招商報中一節
除成化年間兩淮山東運司中剩殘鹽歷年久遠未審
有無見在已經行移各該運司查報至日另行議擬奏
請定奪外其陰陽僧道義官知印承差等項上納銀兩
先因陝西地方災傷擬行後因彼處收成頗豐并本部

先因運送賑濟等項銀兩數多及因京邊賞賜官軍銀兩不敷間遇各處解到僧道等項銀兩補贖支用訖其未到者又係撫巡官員奏稱災傷存留本處借用即今本部見無收貯亦無解到銀兩况承差加納銀兩例已停止近因內府承運庫奏稱國用不足尚且行取各省在庫金銀解京送用及奉欽依今後各邊運送銀兩照正統景泰年間例行不許例外加添所據僧道等項上納銀兩難再類送為此合行移咨前去煩為查照施行

一爲經理要害邊防保固疆場事

吏部覆本部送於吏科抄出總制陝西延寧甘肅等處邊務兼督理馬政都察院右都御史楊題查得臣欽奉勅先因花馬池等處邊防久弛勅爾用心整理近該爾會同議處各項事宜甚爲周悉足見體國安邊至意勅至爾即照兵部會議過事理於去年賑濟官銀內動支十萬兩招商納米以備食用一應合用工料預爲措置停當待相應時月督同各該鎮巡官將延綏定邊營迤

西至寧夏橫城寧塞營迤西至定邊營橫城迤北至黑
山營各處邊牆壕塹陸續興工修築高厚挑濬深闊原
無牆溝去處一體修築墩臺煖鋪小堡待前項工程稍
緩以次修舉其餘悉依原擬施行勅內該載未盡者聽
爾從宜區處事完之日將修過工程用過錢糧數目造
冊奏繳爾建此大議受茲重託必須殫心竭力務求事
可功成一勞永逸人無嗟怨寇絕窺覲朝廷免西顧之
憂邊民享太平之樂毋或虛費財力自貽咎愆欽哉欽

此欽遵會同巡撫陝西右副都御史張泰巡撫延綏右副都御史文貴巡撫寧夏右僉都御史劉憲行令陝西布政司支取去年賑濟官銀十萬兩招商納米以備食用一應合用工料預為措置待黃河開消之後哨探套內無賊起倩軍民人夫先將原擬延綏定邊營迤西至寧夏橫城邊牆壕塹三百餘里分工修築挑濬寧塞營迤西至定邊營延綏鎮巡官一併興工其橫城迤北至黑山營牆塹待前項工程就緒寧夏鎮巡官一體修築

整理及照依原擬會委陝西布政司左叅政唐錦舟陝西按察司副使王寅陝西都司軍政掌印都指揮僉事房懷專蒞其事務期一勞永逸潛消敵人窺伺之心以爲腹裏人民經久無窮之利待事完通將修過工程用過錢糧造冊奏繳外臣會同巡撫陝西右副都御史張泰議照前項經理要害邊防工力浩繁事體重大非旬月之間可以責成必須假以歲年從容區畫則事集而人不告勞事干各鎮若無三司重臣專理誠難就緒但

陝西地方政務繁冗布按二司官員各有專職今雖暫委各官管理其原管事務又令別官帶管未免顧此失彼況工程皆在沙漠邊遠之地必得有精力有巧思不避艱險能耐勞苦之人庶可倚託切見近年巡撫大同右副都御史劉宇修理邊牆奏保郎中李惟聰陞授按察司副使提督工程事完改選緣今經理邊防事體相同臣等博訪得西安府同知張敏平涼府同知岳思忠鞏昌府同知張檄陝西苑馬寺寺丞朱璜俱通敏老成

精勤強幹歷官陝西年久熟知地方事情相應舉用如蒙伏望聖明軫念邊方大計全陝軍民安危所係乞勅吏部再行訪察合無比照大同事例於張敏岳思忠張檄朱璜四人中定擬二員上請量陞陝西按察司僉事職銜專令提督修理前項邊牆壕塹墩臺煖鋪營堡待原擬工程通完之日本司有缺具奏補缺管事如本司無缺起送改除如此則邊方大計既可責成而別項政務亦不妨廢實為便益等因具本該本部官欽奉聖旨

吏部知道欽此欽遵行間隨該巡撫陝西等處地方右副都御史張泰亦題前事通抄送司查得布按二司自天順年以後添設官員俱奉欽依裁革訖今該前因案呈到部看得都御史楊題稱各處邊牆壕塹經理要害工力浩繁要將西安等府同知張敏等并苑馬寺寺丞朱璜四人中定擬二員量陞僉事專令提督一節緣前項邊方工力委的重大相應專官管理但今添設官員俱奉欽依裁革所據前項官員似難添設為此合咨前

去煩照原擬會委左叅政等官唐錦舟等着令專一提督修理其各官原管事務徑自責委相應官員帶管施行

一爲器使將才以脩戎務事

兵部覆該本部送於兵科抄出總制陝西延綏寧夏甘肅等處邊務兼督理馬政都察院右都御史楊題臣惟三軍之命實係於將而戰守之將其用亦各不同今之叅將分疆畫地各守一隅所謂守將遇警言固未嘗廢戰

而其用則先於守今之遊擊隨賊聲勢往來策應所謂戰將所至固未嘗無守而其用則專於戰守將之務脩車馬備器械據要害固封守明斥堠謹禁防寇至而先為之備不必求取戰功求無所失而已若遊擊之官披歷荆棘眠宿霜露非身先士卒不足以鼓勇齊力非躬冒矢石則不能解圍潰堅雖謀勇貴乎兼濟而常以勇為主是二者固未始不相通而目前之用則先其所急切見分守延綏東路右叅將都指揮僉事時源性資果

敢膽氣猛厲慣經戰陣驍勇著聞今分守一方雖亦未
嘗廢事使當遊擊之任衝鋒破敵是其所長延綏遊擊
將軍都指揮同知戴欽性資明爽才識疏通曉暢邊情
熟閑戎務今為遊擊非無可取若居分守其所建立必
有過人且人才難得用違其長雖能者無以自見隨才
器使則天下無不可用之人况延綏慣戰精銳之兵東
西應援必得驍將領之而神木孤山一帶營堡密邇河
套敵衆遇冬首先窺伺分守得人有不戰自屈之勢如

蒙乞勅兵部再行訪察如果臣言可採合無上請將時源改充遊擊將軍戴欽改任分守叅將各換勅行事則此二人者易地而居各當其才戰守之寄兩有所托待其勞效顯著主副將官之基未必不由於此等因具本該本部官欽奉聖旨兵部知道欽此欽遵抄出送司查得先為黜不職以禦邊寇等事該巡按陝西監察御史燕忠題稱分守延綏東路右叅將烏銘縱賊長志貽患地方要行提究選官更替等因該本部依擬推舉得指

揮姜漢時源俱各相應題奉孝宗皇帝聖旨是時源陞署都指揮僉事充右叅將分守延綏東路地方欽此又為缺官事照得延綏缺遊擊將軍該本部推舉得都指揮戴欽烏銘俱各相應等因題奉聖旨是戴欽着充遊擊將軍欽此已經通行欽遵去後今該前因案呈到部看得陝西總制都御史楊奏稱分守延綏東路右叅將時源性資果敢驍勇素著長於征戰延綏遊擊將軍戴欽才識疏通曉暢邊情長於分守欲將各官隨才更調

一節既該總制官員議奏前來必其考驗有素叅酌停當合無依其所奏將時源改充遊擊將軍戴欽改任分守叅將候命下之日各換勅賫令各照今任地方行事仍行總制及各該鎮巡等官轉行各該一體欽遵施行緣係總制官員奏要更調將官及奉欽依兵部知道事理未敢擅便正德二年二月十三日本部尚書閻等具題本月十五日奉聖旨是時源改充延綏遊擊將軍戴欽改分守延綏東路叅將都換勅與他欽此欽遵查得

延綏遊擊將軍原擬責在統領原選遊兵三千操練聽調務要律已奉公撫恤軍士圖樹功名以副委用如或貪黷債事罪有所歸仍聽總制鎮巡等官節制延綏東路叅將責在操練軍馬脩理城堡遇有賊寇即便相機勦滅凡事須聽總制鎮巡等官節制案呈到部擬合通行除外合咨前去煩為查照欽遵施行

一為經理要害邊防保固疆場事

題為經理要害邊防保固疆場事據鎮守寧夏總兵官

都督僉事李祥呈抄蒙臣鈞帖前事會同鎮守太監葛
全巡撫右僉都御史劉憲副總兵都指揮僉事衛勇備
行各該營堡及寧夏等四衛催促原擬官軍扣期赴工
及擇本年三月二十七日卯時本職親詣告祭破土四
月初一日於本鎮橫城興工築打邊牆緣由到臣案查
先於正德元年十二月初九日欽奉勅先因花馬池等
處邊防久弛勅爾用心整理近該爾會同議處各項事
宜甚為周悉足見體國安邊至意勅至爾即照兵部會

議過事理於去年賑濟官銀內動支十萬兩招商納米以備食用一應合用工料預為措置停當待相應時月督同各該鎮巡官將延綏定邊營迤西至寧夏橫城寧塞營迤西至定邊營并橫城迤北至黑山營各處邊牆壕塹陸續興工修築高厚挑濬深闊原無牆溝去處一體修濬墩臺煖鋪小堡待前項工程稍緩以次修舉其餘悉依原擬施行勅內該載未盡者聽爾從宜區處事完之日將修過工程用過錢糧數目造冊奏繳爾建此

大議受茲重託必須殫心竭力務求事可功成一勞永逸人無嗟怨寇絕窺覲朝廷免西顧之憂邊民享太平之樂毋或虛費財力自貽咎愆欽此欽遵正德二年閏正月內行據鎮守寧夏總兵官都督僉事李祥鎮守延綏總兵官都督僉事張安并各路分守叅將等官閻綱葉椿等各呈稱在套敵衆俱各過河去訖套內並無聲息緣由前來臣會同巡撫陝西右副都御史張泰巡撫寧夏右僉都御史劉憲議照應修工程自寧夏橫城起

至延綏定邊營迤東石澇池寧靜墩界止邊牆三百餘里連壕塹共該六百餘里原擬人夫九萬餘名若一併起派上工誠恐督工官員顧理不周致令苟且疎畧合將應起人夫分為兩班每班做工一百日頭班自三月初一日為始至六月初十日止次班自六月十一日起至九月二十一日止各工完疎放并會行陝西布政司先支去年賑濟官銀八萬兩運至慶陽府寄庫出榜招商上納夫糧給領官價以備人夫食用及會委都布按三

司官左叅政唐錦舟副使王寅都指揮房懷專理其事
外續因西安平涼固原一帶地方久旱無雨人心憂疑
暫且停止自本年二月十九等日以來各該地方時雨
連降田野沾足麥苗長茂秋田下種人心已安又經行
令寧夏鎮巡衙門擇日祭告及先起頭班寧夏本鎮平
涼慶陽固原一帶軍民人夫興工修築去後今據前因
查得應起軍民人夫兩班共八萬名民夫西安府二萬
二千名鳳翔府五千名平涼府五千六百名慶陽臨洮

二府俱三千五百名鞏昌府九千名共四萬八千六百
名軍夫寧夏三路一萬六千五百五十名陝西都司所
屬衛所并護衛羣牧操牧等所一萬四千八百五十名
共三萬一千四百名比之原先擬奏之數減去一萬名
每班各做工三箇月頭班四月初一日為始至六月終
疎放次班六月初一日為始至八月終疎放每夫日給
口糧食米一升五合仍令戶內量貼盤纏銀多不過二
兩隨帶供送前來以補口糧不及每夫十名共備車一

輶裝載煤炒器具每二名出簾一片椽一根到彼列車
為營覆以椽簾用蔽風雨又遵照題奉欽依事理將漢
中府衛棧道之外地方不起人夫量徵夫價運送工所
買辦蔬肉每月犒勞二次仍支茶馬項下官銀二百兩
行令陝西布政司置買藥餌選取醫生分派各委官處
遇有人夫疾病即為撥醫給藥調治及查得合用撥木
臣於去年已經差撥靖邊衛官軍於本處雪山採打共
三十餘萬俱運至修邊處所牆完就為修蓋營房煖鋪

等項取用及照延綏寧塞營起至定邊營止共該添造墩臺一百四十二座築打剷削邊牆壕塹共三萬七千二百六十丈五尺行准巡撫延綏右副都御史文貴會同鎮守太監劉保總兵官張安欽遵題准事例起倩本鎮東西中三路步軍土兵備禦軍人延綏榆林三衛抽選屯丁舍餘并延安一府所屬州縣民夫俱於本年二月十九日動土興工分派地方陸續築造其寧夏橫城以北至黑山營邊牆壕塹待前項大工就緒之後地方

無事本鎮軍夫次第修理再照套內雖稱哨無敵衆但
恐賀蘭山後之敵窺知修邊或有紮後渡河之謀不可
不防又經行令寧夏鎮巡官摘撥官軍二千員名聽叅
將閻綱管領於牆外架梁防護又摘撥一千員名聽協
同都指揮保勳管領於牆內巡邏策應及延綏地方已
該巡撫都御史文貴議行副總兵姜漢量領兵馬架梁
防護各待工完通將修過工程用過錢糧數目造冊奏
繳外臣聞之易曰王公設險以守其國詩曰城彼朔方

古之帝王制禦四夷未嘗不以險固城守為務今花馬池一帶邊備疎畧地里平漫大敵每從此拆牆深入搶掠自花馬池靈州直抵固原平涼田不得耕畜不得牧生理蕭條日甚一日皇上軫念邊方命臣經理臣罄竭駑鈍建此大議興此重役一勞永逸誠非得已但興工之初動勞軍民難保無怨若憚勞卹怨不行起時整理誠恐向後邊寇仍前擁衆深入侵擾則平慶臨鞏固原靖邊等處軍民不免重遭寇掠西安鳳翔等府地方賊

雖難到徵調軍馬合用糧草浩繁它運轉輸勢所不免
破產陪納困苦轉甚今修濬前項牆塹每班不過一百
日之工誠使邊牆完固向後敵衆不敢輕犯人民安業
在邊者不被搶掠在內者不須它運受百日之勞而享
百年之利得失利害較然可知夫凡民不可與慮始而
可與樂成人臣不難於論事而難於任事况以佚道使
民雖怨不卹但恐傍觀坐談之人既不慮地方安危又
不知事情本末且謂後來干係非已所當輒生異議輕

為撓沮邊防大計付之若何仰惟聖謨淵深成命已定
必無是事此臣私憂過計犬馬惓惓一寸之忠也臣近
患目疾痠疾日久未痊已經具本陳情俟命外緣大工
既興合當奏報為此今將經理處置畧節緣由并祭告
破土興工日期具本謹具題知

一為遵明詔更置將官以甦久疲邊人事

題為遵明詔更置將官以甦久疲邊人事准兵部咨該
本部題該臣題前事本部看得臣奏稱查勘過洮岷河

州西固階文等五處地方密邇諸番叛服靡常原設守
備官員難以裁革但守備洮州都指揮趙寧岷州都指
揮閻縉俱各不職欲要革罷另行推用一節緣前項各
該地方守備官員既該總制官員勘稱裁革不便合無
依其所奏本部行移本官除將趙寧行令替職閻縉令
回原衛仍另推相應官員前來上請簡用其餘俱各照
舊存留守備其稱各官家屬衆多未免分外供應甚又
肆意侵漁潛交番賊誠為貽患地方相應禁治亦合通

行本官轉行前該守備各官今後跟用家人止許存留
十數名在彼其餘俱發回原衛不許仍前多帶以致供
應太繁軍士受害及敢有侵尅交通等情聽總制巡按
等官指實叅奏拏問決不輕貸等因具題奉聖旨是欽
此欽遵備咨到臣除趙寧行令替職閻縉令回原衛其
餘守備官員俱各照舊存留仍通行嚴加禁約但有多
帶家人擾害地方及有侵尅交通等項情弊指實叅奏
拏問外竊照岷州洮州二衛設在萬山之中極鄰番境

守備將官撫馭番敵操練軍馬保障地方關繫不輕前
項不職官員既革罷代之者若非從公慎擇其人不無
仍蹈故轍貽患生弊博訪得守備階文署都指揮僉事
張鎬京營協贊見在陝西聽用署都指揮僉事楊義俱
明敏疏通長於撫馭堪以守備岷州平涼衛指揮使趙
文西安左衛指揮僉事楊宏俱老成練達熟知番情堪
以守備洮州如蒙乞勅兵部再行訪察如果各官才有
可取合無奏請於張鎬楊義內擢用一員守備岷州地

方趙文楊宏內擢用一員守備洮州地方各照例請勅行事庶幾兵民不至受害番夷可保無虞緣係該部題奉欽依行令推舉守備官員事理未敢擅便謹題請旨
一爲衰病乞恩休致事

奏爲衰病乞恩休致事臣年五十三歲由成化八年進士任中書舍人歷陞山西陝西按察司僉事副使太常寺少卿南京太常寺卿弘治十五年十二月內欽陞都察院左副都御史督理陝西馬政尋兼巡撫陝西地方

正德元年正月內荷蒙皇上簡命總制陝西等處邊務
續蒙聖恩陞本院右都御史臣稟賦素弱血氣早衰中
年以來耳鳴如蟬目眩生花元氣受虧火邪乘之痰暈
嘔逆時作時止腰膝無力行立艱辛去冬十一月間前
往寧夏花馬池等處閱視邊兵兩目為風沙所傷回
至環縣赤腫疼痛不能視物彼因敵衆在套又自念奉
勅經理邊防責任重大不敢求退已於今年正月內具
本乞取醫士前來隨軍治療前疾痊可誓竭駑鈍以圖

報稱閏正月間敵衆出套軍馬擣散回營臣亦暫回平涼整理馬政兼治前疾日復一日病勢愈增兩目轉加昏眊行立欹側漸成痿軟近又加患心疾夢寐不安神爽飛越稍勞思慮怔忡不已緣臣受恩如天欲報無地方圖經營士馬修飭邊防使敵衆不敢侵犯軍民得安生業以少酬覆載生成之德奈何器質庸凡行能淺薄崇階厚祿踰分過量事權太重力不能勝是以不為造物所容未老而衰百疾並見若非急求休致實恐不得

生還鄉里再念臣原籍雲南安寧州人臣父景任廣東
化州同知致仕貧不能歸寄籍湖廣巴陵縣臣年一十
二歲以明經童子舉于朝臣父母偕來京師臣舉進士
未一年臣父病故貧不能歸葬又依臣姊氏卜葬于直
隸鎮江府丹徒縣地方臣無子以雲南堂兄之子紹芳
為嗣寄籍丹徒看守臣父母丘塋臣之一身旅寓漂泊
蹤跡孤單深慮却顧益難自處豈可久貪榮利驅已衰
之筋力犯不知止之戒乎況今達衆遠邈河套肅清軍

情稍緩至於經理花馬池一帶邊防事宜合用人夫錢糧器具等項臣已區畫停當若責成陝西延綏寧夏三鎮巡撫官員依擬整理自足濟事臣孱軀病體委的不能支持是以昧死瀝血上陳哀悃伏願皇上弘天地之量寬雷霆之誅憫臣衰病察臣誠款放臣回還丹徒縣致仕居住使得與田夫野老歌詠太平或前病稍痊將以暮年餘力教鄉人子弟惟忠惟孝以為他日効用之地所以仰酬朝廷曠蕩之恩者庶幾其在此也臣不勝

隕越俟命之至緣係衰病乞恩休致事理未敢擅便謹具奏聞伏候勅旨

一爲謝恩事

奏爲謝恩事准吏部咨該臣奏爲衰病乞恩休致事奉聖旨卿盡心爲國多効勤勞方切委任而乃累陳有疾懇求休致特茲俞允給驛回去病痊之日有司來說起用吏部知道欽此欽遵備咨到臣除望闕叩頭謝恩欽遵回還外伏念臣本庸愚荷蒙聖朝作養甄拔歷官中

外有年近者復蒙皇上授以崇階委之重任涓埃無補
盛滿難堪方圖鞭策駑鈍不意病疾纏綿昧死陳情乞
容休致仰荷聖慈矜允天語褒嘉既許其給驛還鄉又
期其病痊起用天地之恩至深至厚豺獮雖微亦知報
本回鄉之後若病候稍康則殘喘餘生皆陛下之所賜
也惟當與田夫野老詠歌舞蹈祝萬年之聖壽樂四海
之治安臣不勝感激仰戴之至緣係謝恩事理為此具
本謹具奏聞

一爲經理要害邊防保固疆場事

兵部等衙門尚書等官劉等題該本部題該總制陝西
延綏寧夏甘肅等處邊務兼督理馬政都察院右都御
史楊奏查得臣節該欽奉勅先因花馬池等處邊防久
弛勅爾用心整理近該爾會同議處各項事宜甚爲周
悉足見體國安邊至意勅至爾即照兵部會議過事理
於去年賑濟官銀內動支十萬兩招商納米以備食用
一應合用工料預爲措置停當待相應時月督同各該

鎮巡官將延綏定邊營迤西至寧夏橫城寧塞營迤西至定邊營并橫城以北至黑山營各處邊牆壕塹陸續興工修築高厚挑濬深闊原無牆溝去處一體築濬墩臺煖鋪小堡待前項工程稍緩以次修舉其餘悉依原擬施行勅內該載未盡者聽爾從宜區處事完之日將修過工程用過錢糧數目造冊奏繳欽此已經欽遵會議整理合用錢糧物料等項起倩軍民人夫已於本年四月初一日興工及具題外臣近因有疾奏乞休致荷

蒙聖恩俞允欽遵將前項修邊文卷簿籍咨送巡撫陝西右副都御史曹元接管施行臣回還原籍養病伏念前項修理邊防將以保障腹裏人民一勞永逸誠非得已臣凡有所見荷蒙采納今乃以病不克終事慙負國恩罪當萬死及查得巡撫陝西都御史張泰巡撫延綏都御史文貴巡撫寧夏都御史劉憲俱係經該會議官員奉勅同心協力共成大役今各官俱陞任去訖竊恐此役人心懈怠苟且疎畧徒費財力事不經久且邊牆

雖固未有不資兵而能守者若既成之後守臣不能講求規畫布署官兵防守則亦不能阻遏敵騎負臣初志以貽後責伏望聖明早下該部計議責成各該新任巡撫會同鎮守官員照該部會議及臣等會處過事宜督同原委都布按三司官員起時陸續整理務期成功既成之後遇冬敵衆入套尤須分布將士慎守藩籬使彼不生窺覷之念沿邊腹裏人民不至遭殘害此衰病臣犬馬朴忠不能自己之惓惓也等因具本該通政使司

官奏奉聖旨該部知道欽此欽遵抄出送司查得先為
前事該總制陝西等處都御史楊奏內開應築邊牆自
延綏定邊營迤東石澇池地界起至寧夏地方橫城止
共三百里沿邊舊有墩臺邊牆委的壕塹窄淺牆垣低
薄墩臺稀疏乞要斟酌損益將舊牆內外幫築高厚各
二丈收頂一丈二尺兩面俱築垛牆高五尺連牆共高
二丈五尺除垛牆根占兩面共四尺尚餘八尺之地每
牆一丈開垛口一處安置轉關遮板牆外每里添築敵

臺三座每座相離一百二十步底闊周圍四丈五尺收頂周圍二丈二尺上蓋煖鋪一間傍牆於空濶要害有水頭去處增添小堡高厚丈尺畧與邊牆相等墩空去處仍酌量添築墩臺牆外壕塹挑濬深二丈口闊二丈二尺底闊一丈五尺前項敵臺九百座煖鋪九百間每間用五人守之該用軍四千五百名無事之時止守舊墩每冬月河凍不拘敵衆曾否入套即便調撥鋪軍上牆防護及添撥軍人於新墩守哨河開無事疎放回營

牆上設置籌牌柳鈴晝夜往來巡警廣張旗幟聯絡相應分委的當官員各定鋪分護守叅將協同守備官各照所管地方提調敵人若果入套必似前窺伺侵犯原擬徵調延綏遊奇土兵及寧夏副總兵等人馬各於定邊花馬池興武營清水營靈州等處駐劄仍各分兵於新舊小堡內按伏策應其間應分應合事宜又在臨期調度如此則邊備嚴密威武振揚足以伐其邪謀不敢輕易近牆若是仍前填壕近牆攻挖官軍出列牆上敵

臺兩邊各用鎗砲矢石攻擊所來愈衆則所傷愈多步兵擊之於牆上騎兵待之於牆內其鋒必沮其氣必喪彼自遠來利於速戰入既無策勢必遁歸縱使桀驁不肯悔過結衆攻圍邊牆受敵不支然相持之間未免少延時日烽火傳接環慶固原一帶人畜既斂兵備既嚴可保無失事不得已則我邊兵姑斂入大小城堡以避其鋒敵果深入速將原拆牆口補塞量留官軍堅壁固守各挑精兵襲蹤而入陝西官軍撓之於內俟其將遁

躡蹤而出延寧精兵邀之於中沿邊官軍拒之於外敵
雖梟雄豈有善歸之理就令小有侵掠比至邊牆我軍
仍於牆上裏面垛口用鎗砲矢石攻擊勢必潰亂諸軍
乘之縱不能使其匹馬不旋亦必大遭挫衄可保數十
年不敢入套犯邊及稱該用軍民人夫口糧欲要於賑
濟官銀內動支十萬以補招商上納俱於今年措置停
當期以明春邊方少靖四月興工八月完備等因該本
部會議得敵性桀黠深入敢戰非得溝牆深高墩堡聯

絡鮮不坐受其敝况前項地方地廣兵分實難防遏連
年失利可為明鑒今都御史楊所陳曲盡經營之計事
非得已但今年民遭荒歉來歲便未甦息若將邊牆墩
堡敵臺一時併修誠恐民不堪命合無令兵部仍行本
官准令於前項官銀內動支十萬兩先行分委廉幹官
員隨宜招商上納糧米務在充實足勾夫役闕支待明
年八月哨探河套無事年成有收起倩軍民人夫將邊
牆壕塹先行依擬幫築挑濬其敵臺煖鋪小堡候待民

力有餘然後漸次興工此外一切處置事宜悉依原擬施行其用工人役嚴督管理官員加意撫恤使忘其勞所築牆垣等件務須比舊堅久有益防守不為徒費財力及開奏延綏地方寧塞營之東有險可據騎難馳突寧塞營迤西至舊安邊營舊安邊營迤西至定邊營各九十里川原平漫與花馬地方相類既無邊牆雖有溝塹俱為沙土擁填平滿萬騎馳驟不能阻遏前此敵衆每從花馬池清水營地方拆牆深入取其捷徑今若將

花馬池一帶邊防整飭完固萬一點寇自定邊安邊之間擁衆而入西向花馬池邊牆以裏地方自西而南不過稍迂百餘里則修邊工程歸於無用誠如巡撫都御史文貴所言行據三司委官叅政安惟學僉事胡經等勘量得定邊營迤西石澇池地界起至寧塞營迤西地界止共長一百六十三里三百四十五步內平漫相應築牆挑壕者一百三十一里三百四十九步山崖險峻堪以剝削者三十一里三百五十六步合無責成巡撫

都御史文貴照依所擬應築牆者築牆應剷削者剷削
但前項地方已該文貴新築甃墩制度精巧非惟便於
瞭望亦可按兵擊賊所患墩空隔越稀疏合准本官所
擬於中空量為添築小墩臺安在邊牆居中墩依於牆
尤便防守其餘溝塹敵臺煖鋪俱照寧夏邊牆一體整
飭修理但邊牆高厚丈尺比之寧夏地方稍省合用人
夫除本鎮外聽於延安一府所屬州縣量數起用務令
沿邊有備腹裏無虞等因又該本部會議得敵衆譎詐

此沒則彼出東備則西侵必須在在戒嚴庶彼無間可
投前項地方既該總制官員議處前來相應依擬但當
歲荒之餘而興此浩大之役民力或恐不勝合無令兵
部仍行本官轉行彼處巡撫查勘本境地方今年果無
災傷軍民安堵亦照花馬池事體起倩軍民人夫將邊
牆壕塹先行依擬幫築挑濬其餘敵臺等項亦候年歲
豐稔民有餘力然後漸次興工中間一切處置事宜悉
依原擬施行務使工程堅完民不告勞敵人絕西入之

望邊方享永久之利斯為盛舉又開奏寧夏橫城北黃河東崖舊有邊牆一百八十五里壕塹一道高厚深闊悉如花馬池一帶城塹之數自南而北有長城十八墩後守臣恐有稀疏每墩空內添設一墩共見在墩臺三十六座牆裏套內地方又設石嘴暖泉二墩瞭守其第十八墩與河西黑山營鎮遠關相對每年於黑山營屯聚人馬阻遏敵騎以為寧夏北門鎖鑰前人綜理周密深有所見節因寧夏守臣怯懦士馬削弱河東墩軍累

被套人撲捉既將石嘴暖泉二墩廢棄遂將新舊三十
六墩俱廢而不守謂之備夏不備冬却止於河西築立
墩臺一十五座守瞭由是套衆多寡遠近消息通不知
覺又因黑山營曾被敵衆攻圍遂將官軍那入平邊城
操備由是平邊城為極邊要害平人徃徃不得耕牧殊
不知撲捉墩軍窺伺城堡乃敵衆常事顧吾所以待之
者何如耳吾能徃彼亦能徃我退一尺則彼進一尺河
東墩臺即不可守使敵乘凍渡河則西岸之墩獨不可

掏挖乎黑山營有備則平邊為腹裏今廢黑山營而不
守假使近窺平邊亦將并廢之乎是皆不通之論也今
花馬池一帶邊牆既欲幫築高厚又於牆盡頭橫城之
南添築一堡量屯兵馬防禦河開之後縱有侵擾不能
為患但恐冬深河凍踏冰而西仍謀入寇容或有之意
外之防不可不謹所據河東三十六墩邊牆壕塹誠宜
幫築修濬河西黑山營誠宜屯宿重兵但前既修延綏
花馬池一帶邊牆工程浩大力不能及合無行令寧夏

守臣明年將河東新舊三十六營坍塌損壞者量為修補照依舊規撥軍守瞭與河西墩臺烽火相接不至失誤官軍應援稍候一二年仍將前項橫城以北三十六墩牆塹悉照花馬池一帶邊防幫築高厚挑濬深闊敵臺煖鋪護守官軍一體處置整理仍挑選精銳人馬於黑山營按伏以為平虜城聲援等因又該本部會議得河東三十六墩并河西黑山營若使戍守嚴備踏水渡河不敢輕忽平邊地方益重保障今若棄而不守是撤

藩籬而守門庭堂陛之患勢將必至今總制官員奏要
修復舊制誠得前人綜理至計相應依擬但大工併作
民力委有不堪合無令兵部行令本官轉行寧夏守臣
將前項河東新舊墩臺坍塌損壞者照依舊規暫且量
為修補撥軍守瞭與河西墩臺烽火相接以備踏冰過
河候各該工程稍集仍依原擬修築施行各該工完之
日通將用過錢糧數目修過工程丈尺備造文冊奏繳
等因具題奉聖旨是都准擬行欽此已經通行請勅各

官欽遵去後又為前事准工部咨該總制陝西等處都御史楊奏稱行據寧夏鎮巡等官回稱備行各該營堡及寧夏等四衛催促原擬官軍扣期赴工及擇本年三月二十七日本職親詣告祭破土四月初一日於本鎮橫城起興工築打邊牆緣由到臣案查正德二年閏正月內行據鎮守寧夏總兵官都督僉事李祥鎮守延綏總兵官都督僉事張安并各路分守叅將等官閻綱葉椿等各呈稱在套敵衆俱各過河去訖套內並無聲息

緣由前來臣會同巡撫陝西右副都御史張泰巡撫寧夏右僉都御史劉憲議照應修工程自寧夏橫城起至延綏定邊營迤東石澇池寧靜墩界止邊牆二百餘里連壕塹共該六百餘里原擬人夫九萬餘名若一併起派上工誠恐督工官員顧理不周致令苟且疎畧合將應起人夫分為兩班每班做工一百日頭班自三月初一日為始至六月初十日止次班自六月十一日起至九月二十一日止各工完疎放并會行陝西布政司先

支去年賑濟官銀八萬兩運至慶陽府寄庫出榜招商
上納夫糧給領官價以備人夫食用及會委都布按三
司官左叅政唐錦舟副使王寅都指揮房懷專理其事
及行令寧夏鎮巡衙門擇日祭告并先起取頭班寧夏
本鎮平涼慶陽固原一帶軍民人夫興工修築去後今
據前因查得應起軍民人夫兩班共八萬名民夫西安
府二萬二千名鳳翔府五千名平涼府五千六百名慶
陽臨洮二府俱三千五百名鞏昌府九千名共四萬八

千六百名軍夫寧夏三路一萬六千五百五十名陝西
都司所屬衛所并護衛羣牧所一萬四千八百五十名
共三萬一千四百名比之原先擬奏之數減去一萬名
每班各做工三箇月頭班四月初一日為始至六月終
疎放次班六月初一日為始至八月終疎放每夫日給
口糧食米一升五合仍令戶內量貼盤纏銀多不過二
兩隨帶供送前來以補口糧不及每夫十名共備車一
輛裝載煤炒器具每二名出簾一片椽一根到彼列車

為營覆以椽簷用蔽風雨又遵照題奉欽依事理將漢中府衛棧道之外地方不起人夫量徵夫價運送工所買辦蔬肉每月犒勞二次仍支茶馬項下官銀二百兩行令陝西布政司置買藥餌選取醫生分派各委官處遇有人夫疾病即為撥醫給藥調治及查得合用撥木臣於去年已經差撥靖邊衛官軍於本處雪山採打共三十餘萬俱運至修邊處所牆完就為修蓋營房煖鋪等項取用及照延綏寧塞營起至定邊營止共該添造

墩臺一百四十二座築打剝削邊牆壕塹共三萬七千二百六十丈五尺行准巡撫延綏右副都御史文貴會同鎮守太監劉保總兵官張安欽遵題准事例起倩本鎮東西中三路步軍土兵備禦軍人延綏榆林三衛抽選屯丁舍餘并延安一府所屬州縣民夫俱於本年二月十九日動土興工分派地方陸續築造其寧夏橫城以北至黑山營邊牆壕塹待前項大工就緒之後地方無事本鎮軍夫次第修理再照套內雖稱哨無賊寇但

恐賀蘭山後之衆窺知修邊或有紮筏渡河之謀不可不防又經行令寧夏鎮巡官摘撥官軍二千員名聽叅將閻綱管領於牆外架梁防護又摘撥一千員名聽協同都指揮保勣管領於牆內巡邏策應及延綏地方已該巡撫都御史文貴議行副總兵姜漢量領兵馬架梁防護及又稱建此大議興此重役動勞軍民難保無怨若憚勞恤怨不行起時修理誠恐向後敵衆仍前擁衆深入侵擾則平慶臨鞏固原靖邊等處軍民不免重遭

寇掠西安鳳翔等處地方寇雖難到徵調軍馬各用糧
草浩繁空運轉輸勢所不免破產賠納困苦轉甚今修
濬前項牆塹每班不過一百日之工誠使邊牆完固向
後敵衆不輕犯人民安業在邊者不被搶掠在內者不
須空運受百日之勞而享百年之利得失利害較然可
知夫凡民不可與慮始而可與樂成人臣不難於論事
而難於任事况以佚道使民雖怨不恤但恐傍觀坐談
之人既不慮地方安危又不知事情本末且謂後來干

係非已所當輒生異議輕為撓沮邊防大計付之若何
仰惟聖謨淵深成命已定必無是事此臣私憂過計犬
馬惓惓一寸之忠也等因具本題奉聖旨該部知道欽
此欽遵抄出備咨送司行間今准前因案呈到部看得
陝西等處總制都御史楊奏稱花馬池一帶牆墩臺遵
奉前該欽依已於今年二月以來興工修築但伊近因
養病還家而各經該巡撫官員張泰等又俱陞任去訖
誠恐此後人務苟簡事難經久又慮成功之後不能設

法防守亦為無補欲要責成新任各該巡撫并鎮守等
官查照原擬起時陸續整理務期成功遇冬仍分兵慎
守以絕邊患一節切緣前項地方墩牆疎薄既無地險
可據兵將寡弱又無人力可倚所以彼易為患我常失
利其都御史楊身任總制之責熟察邊患之由特建前
議雖知大役之興民所難堪然為永逸之圖事非得已
本部先已依擬題奉欽依行令欽遵去後今本官既已
患病解職而又該同事巡撫官員又俱遷轉別任前項


工程雖已擇日興工委官督理然官非經由則錯繆之弊或有不免計失防禦則修築之功亦為徒勞况糴買口糧已費在官銀一十餘萬貼備盤費又起戶役銀一十六萬以至犒勞藥餌之需撥木採運之勞皆本官精神運用計慮周悉所及一旦付之新任各該巡撫官員及更用別項未諳之輩切恐事無統紀人為異同不無錢糧徒費事工無成而邊方保障之功一隳而再難就緒矣以臣等愚見必須仍專諳練大臣一員前去總理

提調方克有濟儻蒙聖明俯從所請候命下之日本部
會官推舉歷練老成熟知邊事者數人上請簡用一員
請勅前去督同各該鎮巡等官查照本部先令奏奉欽
依及都御史楊等會處過事宜將前項議修工程逐一
查勘各該起倩人夫是否見在用工即今有無修築多
寡就便督率原委都布按三司官員起時陸續用心整
理務期經久完固足裨保障既不許玩愒遷延致妨邊
務亦不許苟且疎畧徒費財力如是各起工役俱已了

完仍要規畫方畧布署官兵委任各該鎮巡等官督屬
慎固封守若中間尚有未盡應處事理從宜廣集忠謀
區畫停當徑自施行惟在藩籬之勢既固軍士之威益
壯可以絕邊外觀覲之念免邊民創殘之害工完之日
徑自具奏回京仍將修築過工程丈尺用過錢糧數目
造冊奏繳本部差官閱實上請定奪庶使垂成之功不
至廢弛而防邊之計可圖久遠矣等因具本題奉聖旨
是便會推諳曉邊事的兩三員來看欽此欽遵臣等會

同太師兼太子太師英國公張懋吏部尚書許進等從
公推舉得兵部左侍郎文貴都察院右副都御史張鼎
巡撫陝西右副都御史曹元俱各諳曉邊事堪以委任
伏乞聖明於內簡命一員若用侍郎仍量兼憲職以便
行事令其請勅前去查照兵部前該題奉欽依內事理
欽遵施行仍令兵部行移各該鎮巡等官各查照原奉
勅諭事理一體同心協力共成大事毋得視常怠玩致
有妨誤緣係推舉總理邊務大臣及奉欽依是便會推

諳曉邊事的兩三員來看事理未敢擅便正德二年六月初十日本部等衙門尚書等官劉等具題本月十三日奉聖旨官不必差修築邊牆且罷見在餘剩錢糧着巡撫等官查理秤盤見數銷鎔成錠差人解京欽此



關中奏議卷九